

摘藻堂四庫全書薈要

經部

欽定四庫全書薈要

經部

易經纂言卷一

首



詳校官祭酒臣韋謙恒

欽定四庫全書薈要

易纂言

提要



臣等謹案易纂言十二卷元吳澄撰澄於諸經皆有論撰而於易尤所究心自稱吾於書有功於世視易為尤小於易有功於世為甚大亦高自位置矣其書從古本分經傳經每卦每爻俱詳著其變動分其象占每傳各分章

數皆釋其義於句下而註其字數音釋考正
於末大抵詞簡而義明所謂少引聖籍多發
天然者殆於近之誠沉潛心得之言非浮獵
者比也獨刪改經文不足為訓而繫辭中十
有八卦之釋指為錯簡移之文言傳末尤不
免勇於師心夫史不闕文聖人所謂漢以來
經師授受遇有疑悞但云某當作某皆不敢
輕改經文沿及宋人此風始變自俞庭椿竄

亂周官以後儒者視改經為固然習俗移人
其來有漸不能盡以為澄咎然自澄言之則
為不善用長矣乾隆四十一年八月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷三百四十六

經部

易纂言卷首

元 吳 澄 撰

易者陰陽相變易也上古包羲氏見天地萬物之性情形體一陽一陰而已於是作一奇畫以象陽作一耦畫以象陰見一陽一陰之互相易也故自一奇一耦相易而為四象八卦極於六十四卦是為卦畫之象又作揲蓍之法教民以卦而占吉凶自一變而極於十有八變是為蓍數之變卦象蓍變皆以陰陽相易故名之曰易其時未有易字也後之造字者合日月二文而為易字日陽精昱手畫月陰精昱乎夜日往則月來月往則日來陰陽相易而成晝夜故易從日從月字書又謂易字象蜴蜥之形而假借為變易之易蓋不然也禮記曰昔者聖人達陰陽天地之情立以為易


義皇畫卦之時先作此_二畫_一者為奇陽之象也_二者為耦陰之象也陽渾合无間故一陰受衝即開故_二邵子謂一分为二儀繫辭傳曰易有太極是生兩儀也其畫一其位二其奇耦之數三



奇耦一畫之上再加一奇一耦以象陰陽之有老少
 奇上加奇者陽之純故象老陽奇上加耦者陰雜於
 陽中故象少陰耦上加奇者陽雜於陰中故象少陽
 耦上加耦者陰之純故象老陰後人名之為四象繫
 辭傳曰兩儀生四象邵子謂二分為四朱子謂兩儀
 各生奇耦為二畫者四是也其畫二其位四其積畫
 八其奇耦之數十二蓋一畫加
 一為二其位則倍二為四也



二畫之上又各加一奇一耦奇奇之上加一奇象天
而名乾奇奇之上加一耦象澤而名兌奇耦之上加
一奇象日象火而名離奇耦之上加一耦象雷而名
震耦奇之上加一奇象風而名巽耦奇之上加一耦
象月象水而名坎耦耦之上加一奇象山而名艮耦
耦之上加一耦象地而名坤乾一兌二離三震四巽
五坎六艮七坤八總名之為八卦然當時未有乾兌
離震巽坎艮坤八字及卦字也即此各卦三畫之象
而名為乾名為兌名為離名為震名為巽名為坎名
為艮名為坤也天地山澤日月水火雷風亦有其名
而未有其字繫辭傳曰四象生八卦八卦成列象在
其中矣邵子謂四分為八朱子謂四象各生奇耦為
三畫者八是也其畫三其位八其積畫二十四其奇
耦之數三十六蓋二畫加一為三其位則倍四為八
也



畫至三而卦有八為卦之小成三才之象具矣故定為此圖直豎則乾上坤下離左坎右震左後兌左前巽右前艮右後平布則乾南坤北離東坎西震東北兌東南巽西南艮西北繫辭傳曰天尊地卑乾坤定矣說卦傳曰天地定位山澤通氣雷風相薄水火不相射謂此圖也邵子曰太極既分兩儀立矣陽下交於陰陰上交於陽四象生矣陽交於陰陰交於陽而生天之四象剛交於柔柔交於剛而生地之四象於是八卦成矣乾以分之坤以翕之震以長之巽以消之長則分分則消消則翕也乾坤定位也震巽一交也兌離坎艮再交也震陽少而陰尚多也巽陰少而陽尚多也兌離陽浸多也坎艮陰浸多也乾坤之名位不可易也坎離名可易而位不可易也震巽位可易而名不可易也兌艮名與位皆可易也離在天而當夜故陽中有陰也坎在地而當晝故陰中有陽也震始交陰而陽生巽始消陽而陰生兌陽長也艮陰

長也震兌在天之陰也巽艮在地之陽也故震兌上
陰而下陽巽艮上陽而下陰天以始生言之故陰上
而陽下交泰之義也地以既成言之故陽上而陰下
尊卑之位也順數之乾一兌二離三震四巽五坎六
艮七坤八逆數之震一離兌二乾三巽四坎艮五坤
六也乾坤定上下之位離坎列左右之門天地之所
闔闢日月之所出入是以春夏秋冬晦朔弦望晝夜
長短行度盈縮莫不由乎此矣乾坤縱而六子衡易
之本也





三畫之上又各加一奇一耦邵子謂八分為十六朱
子謂八卦各生奇耦為四畫者十六兩儀之上加八
卦八卦之上加兩儀是也其畫四其位十六其積畫
六十四其奇耦之數九十六蓋三畫加一為四而其
位則倍八為十六也









四畫之上又各加一奇一耦邵子謂十六分為三十
二朱子謂四畫各生奇耦為五畫者三十二四象之
上加八卦八卦之上加四象是也其畫五其位三十
二其積畫一百六十其奇耦之數二百四十蓋四畫
加一為五其位則倍
十六為三十二也


















五畫之上又各加一奇一耦邵子謂三十二分為六十四朱子謂五畫各生奇耦為六畫者六十四蔡氏謂八卦重為六十四卦一卦之上各有八卦是也其畫六其位六十四其積畫三百八十四其奇耦之數五百七十六蓋五畫加一為六其位則倍三十二為六十四也邵子曰一變而二二變而四三變而八卦成矣四變而十有六五變而三十有二六變而六十四卦備矣



畫至六而卦有六十四為卦之大成兼三才而兩之萬物萬事悉備矣故又為此圖以圓函方圓者象天周地外方者象地在中說卦傳曰八卦相錯數往者順知來者逆謂此圖也邵子曰八卦相交錯而成六十四卦數往者若順天而行是左旋也皆已生之卦也知來者若逆天而行是右行也皆未生之卦也無極之前陰含陽也有象之後陽分陰也陰為陽之母陽為陰之父故母孕長男而為復父生長女而為姤是以陽起於復陰起於姤也夫易根於乾坤而生於姤復蓋剛交柔而為復柔交剛而為姤自茲而無窮矣復至乾凡百有十二陽姤至坤凡八十陽姤至坤凡百有十二陰復至乾凡八十陰陽在陰中陽逆行陰在陽中陰逆行陽在陽中陰在陰中則皆順行此真至理案圖可見之矣邵氏曰此圖圓布者乾盡午中坤盡子中離盡卯中坎盡酉中陽生於子中極於午中陰生於午中極於子中其陽在南其陰在北陰圓者動而為天方者靜而為地也

右羲皇之易昔在羲皇始畫八卦因而重之為六十四當是時易有圖而無書也後聖因之作連山作歸藏作周易雖一本諸羲皇之圖而其取用蓋各不同焉三易既亡其二而周易獨存世儒誦習知有周易而已羲皇卦圖鮮或傳授而淪落於方伎家雖其說具見於夫子之繫辭說卦而讀者莫

之察也至宋邵子始得而發揮之於是人乃知有義皇之易而學易者不斷自文王周公始也今於易之一經首揭此圖冠于經端以為義皇之易而後以三易繼之蓋欲使夫學者知易之本源不至

尋流逐末而昧其所自云爾

以上凡八卦其八卦定位六十四卦方圖

凡二圖邵子得之於李之才挺之李得之穆修伯長穆得之希夷先生陳搏圖南蓋義皇八卦重卦既成之後作此二圖也儒者不傳而方伎家傳之以為修養火候之節其一畫二畫三畫四畫五畫六畫凡六圖則朱子推而得之載於易學啓蒙雖失其傳授所自然考夫子繫辭傳所言及邵子觀

物外篇所推則古有此圖也必矣蓋羲皇未作八卦定位重卦方圓二圖之時先有此圖也故今定此以為羲皇之易云

連山



艮下
艮上

此連山易之首卦也以下六十
三卦先後之次不可知

右夏之易周官大卜掌三易一曰連山二曰歸藏
三曰周易其經卦皆八其卦皆六十有四或曰神
農作連山夏因之以其首艮故曰連山今亡

歸藏



坤下
坤上

此歸藏易之首卦也以下六十三卦先後之次不可知

右商之易子曰我欲觀殷道是故之宋而不足徵也吾得坤乾焉說者以坤乾為歸藏或曰黃帝作歸藏商因之以其首坤故曰歸藏今亡

案夏商二易蓋因義

皇所畫之卦而用之以占筮卦序與先天自然之序不同故連山首艮歸藏首坤朱子易贊曰降帝而王傳夏歷商有占无文民用弗彰以為二易无繇辭也或曰春秋左氏傳所載繇辭與周易不同

者蓋夏商之易則以為有繇辭矣然今
莫可考證世俗所傳歸藏易偽書也

易纂言卷首

欽定四庫全書叢要卷三百四十七

經部

易經纂言卷一

元 吳 澄 撰

周易

周者岐山下之地名太王亶父自豳徙居其地至曾孫武王伐商為天子遂以周為有天下之

號易始於義皇周之太王在美里時演義皇八卦之名為六十四且作彖辭周公相成王制禮作樂時又作爻辭以重卦之名及彖爻之辭乃太王周公所作故名之曰周易以別於夏商之易云

上經

文王以六十四卦分為上下二篇此篇首乾坤竟坎離對體之卦六反體之卦十二

反體一卦為二卦總計三十卦謂之上經



乾

下

○

純

父

六

陽

辟

主

上

九

乾

此義皇乾下乾上之卦而文王亦名之曰乾乾天也朱子曰乾者健也陽之性也陽之數奇三畫皆奇之

卦名乾而象天三畫之乾重為六畫上下元亨占也元皆乾則陽之純健之至也故乾之名不易

元亨

占也元首也大

人上為元在一身之上為衆體之長凡有大德為衆善之長曰元或居大位在人上官之正長家之宗嫡皆

可曰元亨字與獻享之享同備物以獻謂之享亨者極盛之時百家聚會有如享禮衆美之物具備也萬物資

始於乾是為天德之首乾有此元德故能致萬物利貞長茂蕃殖之亨也占者有長人之大德者必亨

利貞

占也利者宜於事如刀之刈禾順而便也貞者主其事如木之植榦正而固也占者宜於正主其事也

初九

初之畫得九潛龍象也藏伏而不可見曰潛龍陽為乾之姤物震為龍者一陽在坤體之下

如龍之在地下也陽畫雖不具震體皆可象龍六畫之卦初二為地二地之上初地之下也陽畫在初猶龍之

潛伏於地下勿用占也用謂用之以作事也筮得此而未出見也

九二

為乾居第二畫

見龍在田

象也出而可見曰見田地上也二地上之位九居二

猶龍之出見利見大人占也見謂身親見之凡卦畫陽而在地上也

人位九居二為大人而占者利於見大德之人也

九三

為乾居第三畫

君子終日乾乾夕惕若

象也君者臣之所事也子

者貴稱也天子之大夫稱子諸侯未踰年亦稱子諸侯有臣天子之大夫亦有臣自其臣尊稱之曰君本稱曰子而又尊之故曰君子而凡有位者皆通稱之又借以為有德者之稱也三為六畫卦之人位陽剛得正人之有賢德者君子也三變為柔二三四成離離為日三為人間二為地上日照人間將至于地日將終之時也故

曰終日乾乾謂下乾之終接上乾之始也日既終則厲為夕矣惕戒慎恐懼之意乾剛實心有主故能敬惕厲占也厲危也在下之无咎占也无咎者善其能補過處上如登高臨深故危无咎危地本當有咎以其終日乾乾進修不息至夕猶惕然戒懼故无咎也

九四

九居第四畫為乾之小畜

或躍在淵

象也或者非必之辭淵者地之下龍所潛處謂初也

四之位在人之上天之下與初之位相應言龍潛在淵或其時可以飛而上天則躍而出也既躍則不復在淵而猶言在淵者謂在淵中度其可躍而後躍也見龍在天者謂已飛而在於天田飛龍在天者謂已飛而在於天皆言其已然故為已定之決辭而稱龍或躍在淵者謂將躍而猶在於淵盖言其將然故為未定之疑辭而稱或淵乃四所應之位无咎占也能審度其而非四所居之位也无咎時之可故无咎

九五

九居第五畫為乾之大有

飛龍在天

象也六畫之卦五上為天

利見大人

也占

與九二同五為上卦之人位

上九

上之畫得九為乾之夬

亢龍

象也亢人之喉骨剛而在上也故剛而居高曰亢

有悔

占也悔謂事闕敗而追恨也

用九

六畫俱得九為乾之坤

見羣龍无首

象也羣龍六畫皆陽也乾為首以人身而喻卦

之上畫為首首剛而在上六陽皆變乾體不存則无有剛而在上者矣故曰无首見羣龍无首猶睽上九言見豕負吉

吉

占也六畫皆陽剛之過也變為柔則不偏於剛矣所謂剛健中正純粹精也故吉

經彖辭凡五字爻辭凡六十二字乾乾燥之乾假借渠焉切亨與獻享之享同古讀為香今許

庚切見龍賢遍切利見見羣龍如字亢苦浪切
註長知兩切出見曰見已見賢遍切潛處昌據

切不復扶豆
切度待洛切



坤上

○

八之八上之二經八
純母六陰辟主上六

坤

此義皇坤下坤上之卦而文王亦名之曰坤坤地也
朱子曰坤者順也陰之性也陰之數耦三畫皆耦之

卦名坤而象地六畫之卦上下皆坤元亨占也坤之德
則陰之純順之至也故坤之名不易元亨占也坤之德
亦名元而可利牝馬之貞占也牝馬占中之象也故牧
以致亨也利牝馬之貞之地馬羣中之牝者順以從

陽而專於此一此占謂宜專
一順從於陽以正主事也君子有攸往先迷後得主占

君子有所往者其先迷失道路其後乃得所主陰不可
先倡但可後隨陽明陰暗六畫純陰暗昧之象故迷凡

卦各有一爻為主爻之辭言主者皆謂主爻也坤之上六為主爻主在卦終故後乃得主

利西南

得朋東北喪朋

占也凡卦之位四為西三為南初為東上為北朋同類也占者利於行西南方

則得其朋類若行東北方則失其朋類也蓋六四六三二陰相比近故為得朋初六上六二陰相隔遠故為喪

朋

安貞吉

占也安謂靜也安靜者坤道故正主事則吉也

初六

初之畫得六為坤之復

履霜

象也卦之下畫為地人所履也霜者露所結露者坤土之氣所

化

堅冰至

象也自五月一陰生九月而五陰陰消陽將盡則露為霜矣其時猶有一陽未為純坤也

馴至十月則六陰為坤而水凍為冰至十一月以後而冰益堅夫履霜在坤體未成之前堅冰在坤體既成之後然初履霜而已知堅冰之必至蓋陰盛必至於極而陽消必至於盡也有國家者能知此戒則其於折姦萌

塞禍原宜早圖之豈可坐待其盛哉有象无占占見象中

六二

六居第二畫為坤之師

直方

象也以卦體則坤之中以卦位則地之上故以地取象六居中

而變為剛象地之中天氣自下而上故曰直初三兩耦畫象地之方故曰方

大不習

象也以直計之

地之厚上下相去三萬里以方計之地之廣輪東西相去南北相去亦各三萬里直之厚方之廣有形之物其大无可與比故曰不習習重也言不再有如此大者也

无不利

占也筮得此爻於事无所不利

六三

六居第三畫為坤之謙

含章

象也含如口之含陰陽相間雜而成文曰章發生萬物粲然有

章者陽之為也然非陰成之則不可坤陰含藏陽氣於內陽內陰外有衣錦尚絅闇然日章之美三變為陽有章在內四含之於外而不見其美也可貞

占也可以正主其事也謂不可謂利於義則不能必其利也

或從王事无成有終占也謂儻或從王事雖无成完而可以有終蓋有人倡之已无全功

故曰无成人倡之於先已畢之於後故曰有終

六四六居第四畫為坤之豫括囊象也括謂結之也坤體虛而容物囊之象也四變為奇塞壓其

上猶括結囊之上口人之謹无咎也无譽占也不言雖

亦无稱譽也四變為剛而應初如否之初四上下不交故其象占如此

六五六居第五畫為坤之比黃裳象也五位在中其色為黃坤畫耦象裳之兩開不屬初為足二

為脛三為股而四則身也當裳之要坤為布帛六五以黃色之布帛為裳掩蔽下四畫猶裳之掩蔽人下體也

元吉占也德位之元者得此占則吉

上六

上之畫得六
為坤之剝

龍戰于野其血玄黃

象也陰變為陽
象龍地與天連

接處為野上之位天也坤之畫地也上位之天與坤畫之地相接故象野坤之六陰皆民也上六化陽象龍臨于五民之上則民而為君矣坤為民乃其素分順也民而為君則不順而逆矣上六一民為逆五民之順其肯從之乎故下之五陰與之戰于野戰則上六敗而遭傷故其血玄黃氣陽也血陰也陰傷故言血玄黃者暫變為陽之色黃者本質為陰之色雖變為陽而質則陰故其血雖玄而猶黃也順者理直故下之五陰戰而勝逆者理不直故上之一陰敗而傷或曰血者陰之傷也何以知其非下五陰之傷而必其為上一陰之傷乎曰下五陰傷則其血黃而已无玄也且玄且黃二色混雜以是知其為上六一陰之血也蓋上六陰質化陽君而非君民而非民有如王莽黃巢之死項氏曰玄黃說者謂陰陽俱傷爻辭惡陰之盛故陳其禍敗以為戒血指陰而

言无與陽事澄案舊說以為陽與上六戰故項氏云然今觀卦内无陽何以得陽與上六戰乎

用六

六畫俱得六為坤之乾

利永貞

占也坤之六陰皆變為陽其占利於永久正主事陰柔非

能永久者變為陽故能永久也

經彖辭凡三十字爻辭凡六十字坤困昆切牝頻忍切喪息浪切註比近皮二切夫履音扶占

見賢遍切後不見同與比補履切間居限切衣因既切絅科茗切闇因感切屬之欲切要亦遙切接處昌據切分符問切惡鳥路切无與因據切

䷲

震下坎上○四之六上之三緯八純艮變主九五

屯

此義皇震下坎上之卦而文王名之曰屯屯之字象草上穿出地而下猶未伸物始生艱難未暢達之時

也內卦乾始交坤成震而外卦乾之一陽陷於二陰有所艱阻人方行動於內而外阻險難故為屯元亨

占也元利貞占也屯之時未易亨也其占為大謂九五利貞德之人能致亨則利於正主事勿用有

攸往占也此占於坎取義卦變艮三往五陽利建侯占

此占於震取義卦變艮上來初一君居內為二民之主諸侯之象也故利於筮立君

初九初之畫得九磐桓象也磐石也桓杙也四坎之下為屯之比

應初初地之下也象磐石之根着於地桓木之埋豎於地也震為足初剛變為柔則足弱不能動猶磐石桓杙

之在地而利居貞占也居者靜處也既未可動但利不可動也利居貞於居而貞春秋傳云弱足者居利

建侯占也與彖辭同上言居貞若建而為侯則不可居矣春秋傳云侯主社稷臨祭祀奉民人事鬼神從

會朝又焉得居然則初之磐桓非終不動者也
磐桓居貞以剛變為柔取義建侯以不變取義

六二

六居第二畫為屯之節

屯如遭如

象也如語助遭遲回不進也二有正應然逼近初剛

欲進不能故屯遭

乘馬班如

象也乘馬四馬也班分也猶班師之班卦四陰四馬之象下二陰震

馬也上二陰坎馬也四陰為五所間隔四馬分散之象一車有二服二驂則行四馬分散則不行矣

匪寇

婚媾

象也坎有寇象五為二之正應非寇也乃婚媾也

女子貞不字十年乃字

占也二以柔居柔女子也字許嫁也禮記曰女子許嫁笄而字二為初剛所逼而不得往從五猶女子為強暴所凌而未得成婚也其占為女子所正主之事婚議不成二三四互坤坤數十過坤十數則逢五正應而許嫁矣

六三

六居第三畫為屯之既濟

即鹿无虞惟入于林中

象也即就也鹿虞翻王肅

作麓山足也三互艮下畫山之足也虞掌山澤之官四當三之前在艮山之間虞人之象然應初比五與三不相得不為三之嚮導故三即鹿而无虞人也平地有竹木曰林互坤為平地互艮木也震竹也震坤艮之交故象林坤之中畫故曰中就山麓而獵者必資嚮導若无虞人嚮導則惟有陷入林中而已君子幾不

如舍往吝

占也幾鄭作機弩牙也逸書云若虞機張楚辭云增弋機而在上凡設械以取禽獸皆曰

機不但機弩而已舍釋也占謂君子機而取禽獸不若舍置而不為若往則未必獲禽徒取羞吝也

六四

六居第四畫為屯之隨

乘馬班如

象也與六二同

求婚媾往吉

占也四雖

柔弱不行然初為正應上進就已故占者若求婚媾而往則吉也凡言往者皆謂自內適外

无不利

占也筮得此爻者占求婚固吉占他事亦无所不利
盖四雖才弱然居得其正又有剛正之應求己故也

九五

九居第五畫
為屯之復

屯其膏

象也坎為豕為雨為雲考工
記天下之大獸五膏者脂者

膏謂犬豕五在坎體之中豕之膏也時雨謂之膏雨言
其潤澤如膏也凡坎在上體者象水之氣升而為雲屯
需是也坎在下體者象水之液降而為雨解是也屯卦
坎在上為雲而不為雨天之膏澤艱屯而不下之象

小貞吉

占也

大貞凶

占也

凡易經言小者皆謂陰言大者
皆謂陽此爻之辭小指六二大指九

五屯之二五中正相應非不善也方時之屯未克有濟
六二在下雖有乘剛之難然守正俟時終必復常是小
者之貞可以吉也九五居尊命令不行威權去已不能
度時審勢而有所作為必招禍敗此大者之貞所以凶
也筮得此爻者若所遇之時與象相類在下卑小之人
主事可吉在上尊大之人主事則凶也或所遇之時與

象不同則隨其時隨其事隨其人而審處之以合占之意

上六

上之畫得六為屯之益

乘馬班如

象也與二四同項氏曰凡稱馬者皆陰爻惟大畜九

三特舉乾本象稱良馬他馬皆陰也屯稱馬者卦中四陰也四馬之中獨六三居剛故无虞而徑進二四上居柔皆班而不行屯之泣血連如象也泣者无聲而出涕時柔者不能行也泣血連如血者出涕如出血也連泣貌凡身之液皆水也項氏曰坎為水故有泣血之象陰柔難輔勢孤无應无可延之策矣

六畫俱九六為屯之昴

經彖辭凡十三字爻辭凡八十七字屯張倫切磐俗本作盤遭張連切乘繩證切舍音捨註險難乃旦切未易以豉切着直略切傳直戀切朝音潮焉伊虔切間居限切比皮二切解音蟹度

待洛

切



坎下 艮上 ○ 六之七上之三緯
八純震變主九二

蒙

此義皇坎下艮上之卦而文王名之曰蒙蒙者昏昧

險在內而止亨

於外故為蒙 亨 占也蒙而開啓之則不

匪我求童蒙童

蒙求我初筮告再三瀆瀆則不告

占也古者占筮不過

不吉則可三三不吉則止不復筮故文王特于蒙比二

卦彖辭發三筮再筮之例匪我求童蒙童蒙求我者所

筮之事也我謂教師指九二言九二卦主故稱我童蒙

謂學子指六五言六五艮少男故稱童蒙禮有來學无

往教凡筮人來從師問道初筮若得此卦則可告之告

謂許其來學而教之也或初筮不吉再筮而得此卦或

再筮不吉三筮而得此卦雖非不吉之占然因至再至三瀆神而後得與初筮即得此卦者不同所以不告之也

利貞

占也承上文凡再筮三筮而得此卦者利於正主事也

初六

初之畫得六為蒙之損

發蒙

象也卦之四陰蒙者也二陽治蒙者也陰歛閉陽開發之初六

近九二之陽得陽之開發如徹去其覆口然

利用刑人

占也凡易言用刑必有震二三四互震九

二震之下畫為用刑之主初六得九二開發柔變而剛能助九二施教刑四居相應之位獨遠於陽初變為陽

而應四治四之蒙四為受刑之人初為承稟於二以施刑於四故其占為利於用以刑人也刑如周官所謂鄉

刑上德糾孝圉土聚教罷民以明刑耻之刑人不虧體罰人不虧財者蓋以教愚蒙之民使之知耻知畏而改

過遷善非五刑之刑也

用說桎梏以往吝

占也上為施刑之人占以初柔變為剛而言也

此為受刑之人占以初柔未變而言也桎足械桎首械
互震為足初足械也而在震足之下足械已說於脛之
象坎為耳四首械也而在坎耳之外首械已說於項之
象初畫四畫耦而不連如械木之判而不合故象桎梏
之已說者案周官大司寇平罷民桎梏而坐諸嘉石或
旬有三日或九日或七日或五日或三日以此耻之使
知改悔既說桎梏之後當羞愧懲
艾而不出若遽有所往則吝矣

九二

九居第二畫為蒙之剝

包蒙

象也包如包裹之色容物於內也陽畫連亘有色之象二剛而

得中能色

吉

占納婦吉

占也二五正應如夫婦二居內五在外猶婦在父母家將納之

歸夫家婦人內夫家也上之吉汎言之凡事皆吉也此之吉指定言之占納婦則吉也

子克家

明申

納婦吉之義克家者能勝治家之任也以剛中之子納柔中之婦得其內助則克家矣項氏曰二為子上其嚴

與君

六三

六居第三畫為蒙之蠱

勿用取女

占也陰柔不正故其

見金

夫不有躬

申明勿用取女之義見謂近接於目金夫謂九二六三有正應在上乃近見九二剛強富

實之夫而不能保有其躬以爻位言之四為躬六四柔而正比應皆无陽女之獨處无夫可從能保有其躬者六三不正舍其夫而貳於所見之金夫不无攸利占也能如六四之保有其躬也故曰不有躬无攸利占也

不正不擇所從以占他事亦无所利

六四

六居第四畫為蒙之未濟

困蒙

象也困者四面皆窮无路可通也陰之愚蒙必資陽之啟發蒙

卦四陰唯六四不與九二上九之陽為比應僻遠

愚民无君師以治之教之者也故為困窮之蒙

吝占也

蒙而獨无啟發之者所以吝也

六五

六居第五畫為蒙之渙

童蒙

象也五艮體為童柔中而應於剛中之二如童稚之蒙有所受

教

吉也

上九

上之畫得九為蒙之師

擊蒙

象也二剛皆治蒙者九二剛而得中其於蒙也能色之治之以

寬者也上九剛極不中其於蒙也乃擊之治之以猛者也艮為手有擊象

不利為寇

占也寇謂六三

坎體陰柔不利中正寇也

利禦寇

占也治蒙之初而用刑已非得已况治蒙之終而用兵乎聖人於初

爻為用刑受刑之人兩設其占於上爻為受兵用兵之人又兩設其占焉上九六三正應六三愚蒙為寇者也上九治蒙禦寇者也其占為寇者不利而禦寇者利夫葛伯之仇餉密人之不共湯文王用兵擊伐之者以其

昏迷不悛故也彼若能悛則此无可禦之寇而兵亦不用矣禦者止之使不為寇也上之義取諸艮

六畫俱六九為蒙之革

經之辭凡二十三字爻辭凡六十二字告公獨切說吐活切桎其失切桎公獨切取千聚切註不復扶豆切比皮二切後同少式照切斂上聲徹去起呂切覆孚阜切門茗狄切罷音皮上為此為云偽切後爻為同艾音又勝平聲君與音余舍音捨夫音扶餉式亮切共音恭悛聰全切



乾下坎上 ○ 陽大壯變主九五

需

此義皇乾下坎上之卦而文王名之曰需有孚占也

需此義皇乾下坎上之卦而文王名之曰需

有孚

占也

中實感人之光亨

占也申上意言有人之孚致光顯而亨也

貞吉

占也正主利

涉大川

占也需自大壯而變四往居五三四五互離成舟象

初九

初之畫得九為需之井

需于郊

象也卦中四畫象國中初上象國門相近之郊去險尚遠

而需待不進利用恒

占也初九變為柔成巽得恒下體需于郊者也

體初雖變而終不變則為恒也至終不變是能常久須待不進而近險也

无咎

占也

九二

九居第二畫為需之既濟

需于沙

象也九二剛而在地土位與坎水之中相應猶沙地雖未

瀕水而遠水已漸漬於其中故曰需于沙

小有言終吉

占也小陰也謂二若變為柔則其占如此

有言如鄭息有違言謂以口語相傷也小者得此占雖人有違言而自處不失其中故終吉也

九三

九居第三畫為需之節

需于泥

象也三近坎水剛變為柔亦如水際之溼土故為泥謂須

待于瀕水之泥也

致寇至

象也坎雖為寇已不逼近之則寇何由而至三進逼於險是自致坎寇之

也至

六四

六居第四畫為需之夬

需于血

象也四已在險地坎為血卦故曰需于血

出自穴

象也出謂自內而出外也四者坎內之耦畫象穴往順于五則是自穴而出在外矣

九五

九居第五畫為需之泰

需于酒食

象也坎水為酒二三四互兌為食九五剛中正位天

位酒食燕樂以俟之而已

貞吉

占也

上六

上之畫得六為需之小畜

入于穴

象也入謂自外而入內也四為穴上應三是入于穴之內

也上獨不言需者時既終矣无復有所需也

有不速之客三人來敬之

象也因以

教戒占者不速不召也客三人乾三陽也乾為客來謂處於內如泰之大來也乾三陽在內乃其素處之位非上六所召而來者上六柔正下應九三之陽初二與九三同為陽類上六皆敬之也終吉占也以能敬在下之陽故居需之終而吉也

六畫俱九六為需之晉

經彖辭凡十一字爻辭凡六十一字
註漸漬將廉切樂音洛无復扶豆切



坎下 ○ 六之一上之四緯
乾上 二陰遯變主九二

訟此義皇坎下乾上之卦而文王名之曰訟訟以言相爭辯也以二人言則上剛下險以一人言則內險外健所以有孚占也二以中實室惕申占之意言雖有孚為訟感人而人應之室惕者然猶室塞未通而

惕懼中實故室得中吉占也凡易言初中終皆謂其時

乾健之中畫故惕中吉占也凡易言初中終皆謂其時

吉終凶占也終之時凶者訟至終極而不止利見大人

占也大人者不利涉大川占也訟自遯而變三來居二

乾之九五也占也訟自遯而變三來居二

舟利於進前不利於退後需主爻九五自四上往為五

進舟而前所以利也訟主爻九二自三下來為二退舟

而後所以不利也

初六初之畫得六不永所事象也此邵子所謂意象也

不永所事為訟之履不永所事象也此邵子所謂意象也

小有言終吉占也初六陰也故曰小其占始

事之象雖有言語之傷至終則吉也

九二九居第二畫不克訟象也能勝曰克二與五訟五

為訟之否剛中正居尊位非可勝者故

九二九居第二畫不克訟象也能勝曰克二與五訟五

為訟之否剛中正居尊位非可勝者故

二不歸而逋象也訟由遯而變遯以六居二訟則九居

克訟二二不克訟變剛為柔以避五則九二還

為遯之六二其邑人三百戶象也二變成坤坤為邑二

故曰歸而逋者門之半故一畫之耦為戶庶人有戶无門故民數以

戶稱坤之數十十其十為百坤三耦為三百戶三又坎

數无青占也青過尤也處弱避

也强邑小民寡所以无青

六三為訟之始食舊德象也五四三互兌之倒體口

上九應六三六三食於上九也舊謂素常德謂所得之

食上九在上而食人六三在下而食於人三之從上乃

食其素常所貞厲終吉占也以正主事始雖危而終得

得之食也

可吉以其能從

陽剛之應也

或從王事无成占也從王事坤六三謂

无成而有終但不敢為

倡而已訟六三止云
无成則終始皆无矣

九四

為訟之渙

不克訟

象也與九二同四亦

復即命

象也復還其舊也即命就受命也命自上出者也四訟
五則拒上命矣既不克訟變剛為柔復其舊而受上命
也四變成巽巽為命渝象也渝變也變其安貞吉占也
故有復而即命之象訟上逆命之非也安貞吉占也
以正主事則吉也

九五

為訟之未濟

訟元吉

占也居訟之時有長人之善
而吉也項氏曰人謂九五為

聽訟之君非也爻象皆稱訟何謂聽訟但訟卦五爻皆
不正唯九五一爻既中且正中則我不終訟正則人不
克訟此訟之最善者或為德之尊
或為位之尊不必專指人君也

上九

上之畫得九為訟之困

或錫之鞶帶終朝三褫之

象也錫與也鞶帶革

帶也所以繫鞶繫佩凡命服先束革帶乃加大帶三四互巽為股上九一畫連亘當股之上鞶帶之象也自旦至食時為終朝五之位為日之正中上之位在五之外偏而不中故為日之朝褫鄭本作掙徒可切晁氏曰如掙之義訟勝受服矜喜之極故終朝之間三掙拽而加諸身也上九與坎之上畫為應三坎數也項氏曰凡訟皆起於剛而止於柔九二九四皆剛者也是以起訟終以居柔而不克訟故一逋一渝皆變而止初六六三雖居剛位而其德皆柔故能終吉一為不永所事一為從事无成獨九五一爻有全剛之資有尊大之勢可以訟矣而居中履正非好訟者也故為元吉上九以剛居柔可以不克訟矣而在訟之終居高用剛不勝不已此終訟之凶人也

六畫俱六九
為訟之明夷

經彖辭凡十八字爻辭凡七十一字禡勅紙切
註食於食人音嗣長人知兩切好訟虛到切



坎下 坤上 ○ 六之八上之五緯
一陽復變主九二

師

此義皇坎下坤上之卦而文王名之曰師師衆也
貞一陽在下卦之中衆陰從之有將帥統衆之象焉

大人吉

占也正主用師之事者必大人乃吉大人九二
也陽為大二人位舊本作丈人崔氏憬曰子夏

傳作大人今案子夏傳雖後人附託之書然此彖作貞
大人吉與困卦彖辭同皆以內卦坎中畫九二為大人其
義為得文字蓋大字之訛又案太玄衆首擬師卦其贊
辭曰丈人摧拏蓋用易語則大人之訛為丈在先漢已
然矣王弼解丈人為嚴莊之稱陸績則云丈人者聖人
也澄案論語莊子等書稱丈人者謂老人无力以老而

扶杖故曰丈人解為嚴莊固未當若績之
意則是而無此訓義今定從崔說作大
无咎占也程

而無咎也蓋有吉而有咎者有無咎而不吉者
吉且無咎乃盡善也吉謂必克无咎謂合義

初六

初之畫得六
為師之臨

師出

象也在一卦之內
由內而外曰出

以律否臧

象

教戒辭也謂師出之初宜以律而否臧之春秋左氏傳
曰執事順成為臧逆為否有律以如已也故曰律否臧
此蓋謂聽吹律之聲以占師之或否或臧也案周官春
官大師之職執同律以聽軍聲而詔吉凶鄭註引兵書
云王者行師出軍之日授將弓矢大師吹律合音宮則
軍和士卒同心商則戰勝軍士強角則軍擾多變失士
心徵則將急數怒軍士勞羽則兵弱少威明又案春秋
傳晉人聞有楚師曠曰吾驟歌北風又歌南風南風
不競多死聲楚必无功杜註云歌者吹律以詠八風又
案史記律書曰六律為萬事根本其於兵械尤所重故

望敵知吉凶聞聲效勝負武王伐紂吹律聽聲推孟春以至於季冬殺氣相并而音尚宮司馬氏索隱云古者師出以律凡出軍皆聽律聲澄謂律自坎取象凶占也荀九家逸象坎為律上下空而陽氣實其中也凶初柔弱在下而不正不正非出師之義柔弱非出師之才故凶然聖人先教戒之俾師出之初定其否臧於律因律聲之吉而師不出則不至於凶也

九二

九居第二畫為師之坤

在師

象也在師在軍中也古者制軍之法二千五百人為師五師為

一軍軍將皆命卿九二以一陽在五陰之中猶一軍將在五師之中也

中吉

占也中者以二居下卦之

中也其占為中主之時則吉亦以戒其老師黷武也

无咎

占也與彖辭同

王三錫命

申明中吉

无咎之義將之在師者中之時吉且无咎當膺王三錫命之寵錫命如王使宰周公錫齊侯命王使內史過錫

晉侯命也至于三者天寵之優渥也二應在五五為王三坎之數也

六三

為師之升

師或輿尸

象也坎為輿人死曰尸盧氏曰坤為尸坤尸在坎輿

之上故象輿尸范氏大性曰二為卦主三以失位之柔而乘之此師之所甚忌者故有負軍之象古者兵雖敗猶不忍棄死者故載尸以歸輿尸猶以車山占載棺而謂之輿觀也或者有時而然之辭凶也

六四

為師之解

師左次

象也春秋師次于郎師退次于召陵左氏傳曰凡師三宿

為次虞氏曰震為左澄案兵事尚右右為前左為後故八陳圖天前衝地前衝在右天後衝地後衝在左左次猶言退舍謂不進前而退後也无咎占也程子曰師之進以強勇也四能勝而完師以退愈於覆敗速矣

六五

為師之坎

田有禽

象也田謂二下卦坎有禽象田有禽則可以獵獲利

執言

象也執言謂奉辭以伐罪

无咎

占也程子曰師之興必以蠻夷猾夏寇賊姦宄為生民之害不

可懷來然後奉辭以誅之如此而動乃得无咎若輕動以毒天下咎矣

長子帥師弟子輿

尸象也凡次子以下為長子之弟者皆曰弟子震為長

弟子也帥師當專任長子若又兼任弟子則事權不專威令不一必至喪敗而輿尸以歸六三居剛而乘九二

之上如先穀不順荀林父之命馬謖貞凶占也正主其固違孔明節制以取敗者故有此象

凶程子曰自古任將不專而致覆敗者如晉荀林父邲之戰唐郭子儀相州之敗是也

上六

為師之蒙

大君有命開國承家

象也六上變為剛居一卦之上

大君之象巽風震雷皆命令之象互震在下大君之命
自上而達於下也三四五互坤為國震為諸侯開國也
上變則二三四五上成離象家震為長子承家也此以
師之終言之用師成功大君有命命之或開國為諸侯
或承家為小人勿用占也小人謂細民農工商賈也庶
大夫也 小人在官者亦是若小人得此爻之
占則勿用蓋開國承家之
賞非小人之所可當也

六畫俱六九
為師之同人

經彖辭凡七字爻辭凡六十九字大人舊本作
丈人今依崔憬所定否音鄙長子知雨切註大
師之職大音泰傳直戀切後同內史過君和切
債音奮櫬初覲切度待洛切覆敗孚卜切喪敗
喪去聲穀胡谷切
謬所六切賈音古切



坤下八之六上之五緯
坎上五陰剥變主九五

比此義皇坤下坎上之卦而文王名之曰比二人反面
比相從謂之比一陽居尊而五陰從之如五家為比而

比長統吉占也人相附從原筮元永貞无咎占也原再
之也則无乖爭故吉

蠱謂之原蠱初筮而得此比卦者其占吉再筮而得此
比卦者其占為元德之人永久正主其事則可无咎蓋

不能如初筮不寧方來占也考工記曰唯若寧侯毋或
所占之吉也若女不寧侯不寧蓋諸侯之不

朝貢者也王者再筮而得此卦其占為前
時不寧之國繼今以後友且來朝貢也後夫凶占也

之家再筮而得此卦其占為女子所嫁之後夫則凶蓋
夫不可再也比卦衆陰所從一陽而已如民之戴一君

女之事一夫不可以二因
再筮而發比不可再之義

初六

為比之畫得六

有孚

占也初變為剛以實

比之

象也初與

二相比近故

无咎

占也此自近始二有

有孚

占也此有

盈缶終來

象也初變為剛則初二三四有缶象言有孚

者盈滿於缶之中

有他吉

占也初不止比二而又有他

心而順從九

五則吉也

六二

為比之坎

比之自內

象也此之者初比

貞吉

占也

六三

為比之蹇

比之匪人

象也三近於二二比三者

是人而无人道也故曰匪人

凶也

六四

六居第四畫

外比之

象也外謂五也四

貞吉

占也

正而陽剛中正之賢比之故正主事而吉也

九五

九居第五畫

顯比

象也五以陽剛當天之中衆所共覩與上冥下幽者不同故曰

顯顯比顯明其王用三驅失前禽邑人不誡吉

占也謂

道以此天下也王用三驅失前禽邑人不誡吉
得此爻而用之以田獵也三驅者因田以教戰凡馳驟
進趨皆以三為節周官大司馬仲冬大閱立三表是其
法也驅即所謂驅逆之車驅出禽獸使趨田也三坎數
坤馬駕坤輿以行象驅禽被驅而前去者不追唯順而
來者取之失謂任其去失前指上六禽坎象坤為邑二
三四皆人也誠期約也田獵之時其民竭作不期約之
是聽其自至也九五比之主以一陽統衆陰然上六之
在前者縱其去四陰之在下者不必其皆從王者大公

无我之心不計人之從己而人自无不從此
爻為田獵之吉占而占之中又有此二象也

上六為上之畫得六比之无首象也此謂九五比之聖

外而不親比之也然上六居一卦之上如人首在一身
之上也獨外王化不內嚮九五比之下體具足而獨
上體不完猶人之无首也盖比卦五陰下四陰皆順從
一陽唯上六一陰在一陽之外非嚮化者故有此象
凶占也苗之於舜葛之於湯
崇之於文王自取其凶也

六畫俱六九
為比之大

經彖辭凡十六字爻辭凡六十二字比之匪人
下舊本无凶字今從王肅本比皮二切後不音
者竝同註比長知兩切
若女音汝朝貢音潮



乾下○一之五上之六緯
巽上五陽爻變主六四

小畜

此義皇乾下巽上之卦而文王名之曰小畜小謂陰畜藏也一陰藏畜於五陽之間小者藏畜也

亨

占也雖小者畜藏而亦可亨也

密雲不雨自我西郊

象也坎之水其氣上升為雲其

液下降為雨二三四五兌兌有坎之上半體變坎之下半體上有雲而下无雨也坎之下畫室塞不通室塞象雲之密不通象雨之不降我謂六四為卦主故稱我西四之位又互兌之上畫也內卦象國中四象郊西郊陰方也陽倡陰和則雨陰倡陽和則不雨自西郊陰倡也小畜一陰為主未能成濟物之功故其象如此

初九

初之畫得九復自道

象也小畜一陰為主而初九獨與之應宜有咎也若外不

繫於陰柔內自守其陽剛是為能復復一陽五陰小畜一陰五陽卦之相反者小畜五畫俱變唯初九不變則

為小畜之震九以一陽居初與復之初九同故以復為象道正路也震為大塗故以道為象初之能復也不繫正應之四而比同德剛中之二何其咎占也舍柔應從復而由正道者故曰復自道同德何咎哉

吉占也

九二九居第二畫為小畜之家人牽復象也剛而得中初九舍六四

初之復也二有力焉故曰牽復吉占也

九三九居第三畫為小畜之中孚輿說輶象也輶伏兔也在軸之上承輿者車不行則說之二

若是耦畫則二三四互坎為輿九二奇畫是坎之下畫不存也輿下說去其輶之象九二為輿之輶九三為在輿中之人人在輿中而輿下之輶說則不能行也輶舊作輻晁氏曰案說文作輶澄案輻因音近而誤也輻者

輪轅非可說者作輓

字乃與大畜九二同

夫妻反目象也三夫也四妻也反

互離為目離目視上不視下反目之象初四為正應四

乃初之妻也初能自復而遠絕之三與之比欲以為妻

然四上合五而不下視三故反

其目三欲妻四而四不夫三也

六四

六居第四畫

有孚

占也有孚

血象也坎為血卦三四

傷也四與三

去惕出象也去如微子去之紀侯大去其

不和故有傷

去惕出謂惕懼以出也杜詩

云怵惕久未出避三之見傷故去其所而出外以上

合於九五一陰介二陽之間變為剛實故能惕懼也无

咎

占也不從近比強昏之夫而歸寧歸

宗以依于君親其補過亦可善也

九五

九居第五畫為

有孚

占也有孚

如

申占之意言四

小畜之大畜

四之孚

五五亦學四

其交富以其鄰象也陽實為富陰虛為不富鄰謂四固結言九五富實而能提挈帶挾其鄰也

上九

上之畫得九為小畜之需

既雨既處

象也陰畜藏於陽之內陽旋繞不已則為風巽上畫

變為柔則成坎而為雨故曰既雨雨作而風息處者外陽不復動也故曰既處

尚得載

象也尚猶配也

與己配而在己上者也臣下取帝女曰尚公主漢書卓王孫自以得使其女尚司馬長卿尚謂六四小畜以六

四為主爻而九三以之為妻四在三上故曰尚得舊作

德晁氏曰京房虞翻子夏傳皆作得今從之載者車中

所載之物也坎為輿上九坎之上畫而實其中象車之有載故曰尚得載上九與九三為敵應之爻上九爻辭

自此以下皆取應爻九三及主爻六四而言亦於婦貞卦終終言一卦之義故不專取上九一爻之義也

厲

占也婦亦謂六四六四既與九三反目九三為夫不自正主事而俾六四貞之則危矣

月幾望

象也幾孟荀一行作既今案幾亦有既音左氏傳庸可
幾乎幾既古字盖通用納甲巽卦象既望之月參同契
曰十六轉受統巽辛見平明月幾望者陰之盛謂六四
為卦主也易以月幾望為象者三皆陰為主之卦也筮
日得此爻則**君子征凶**占也君子謂九三也征行也行
以此象為占**君子征凶**軍往正其罪曰征凡行役在路
者皆曰征受制於妻失為夫之
道矣其能行乎故征則凶也

六畫俱九六
為小畜之豫

經彖辭凡十一字爻辭凡六十二字輟舊本作
輻得舊本作德說吐活切摩力專切載才再切
幾音既註和胡臥切轅音老遠絕于願切強昏
起兩切取帝女音娶長卿知兩切所載如字



乾上 允下 ○ 二之一上之六緯
一陰姤變主六三

履虎尾不咥人

此義皇兌下乾上之卦而文王名之曰履履足踐地也卦之初二為地卦自始

而變初柔升三履二之地故曰履卦名連彖辭象也二三四互離為虎離於飛類象雉於走類象虎外文明而中陰質也二與初在後虎之尾也以三履二為履虎之尾上乾為虎之首所履之尾在後而虎首趨前上口不開為不咥人亨占之象三為人亨也

初九

初之畫得九為履之訟

素履

象也絲帛未加采色曰素言不改其舊也初九陽剛安於在下

不變所守素其位而行者也舜飯糗茹草若將終身顏子居於陋巷不改其樂其斯之謂與

往无咎

占也其往也安行其素耳豈有慕乎外而往哉故无咎

九二

九居第二畫為履之无妄

履道坦坦

象也二為地上九二剛變為柔得坤中畫成震大塗

所履者地上之正路

幽人貞吉

占也初在地之下為幽

坦坦然平夷者也

二為人二比初而居中

故曰幽人二比初亦比三然能內取剛正之初而不外昵柔邪之三所以為幽人之正主事而吉也

六三

六居第三畫

眇能視

象也眇一目少也二三四互離為目目眇者所視偏離之

中虛在三不中不正視之偏也視雖偏而離目无所傷目雖眇而猶能視之象

跛能履

象也跛足偏廢

也震為足兌變震之中畫足跛也震下畫之陽猶存足雖跛而猶能履之象

履虎尾

咥人也

象與彖辭同彖通指一卦而言則上九虎之首也虎口實而合有不啞之象此專據一爻而言則三為人之位

兌之上畫也兌口虛而開如凶

占也居不正非能馴暴

人在虎口中故有啞人之象

養貪者其被啞而凶也

宜武人為于大君

象也柔而居剛內剛也外比九四外剛也質柔而內外俱剛血氣之勇非

義理之勇故為武人之象為猶虞書汝為之為謂以膂力之剛而效使令也大君上九也大謂陽乾為君六三應上九以力而效用于大君之象啞人之象其占固凶矣又有此象則不皆凶也易之前民用其變不常者如此

九四

為履之中孚

履虎尾愬愬

象也初為虎之尾四應初下履虎之尾也愬愬

畏懼之貌剛而居柔故能畏懼

終吉

占也臨禍害而能畏懼終獲其吉也

九五

為履之睽

夬履

象也夬決也五剛決去一柔為夬他爻所言履字各爻之自履

也此爻所言履字則卦名之履專指六三而言蓋六三成卦之主也夬與履皆一柔五剛之卦上下二體互易耳六三以不中不正之柔下履九二之剛小人之凌君子也九五與九二德同位應欲為九二決去六三故曰

夫貞厲

占也陽之不能无陰天地之常道君子之不能

去之勢固在所必去苟時勢或有未然則姑且容之而

已决之一乘乘五剛此當去之時可去之勢也故決而

去之為宜履之六三雖乘九二之剛然和說以應上出

力以奉上彼自不中不正耳非能敵陽者也共繇驩兜

與稷契臯夔同處堯朝何損於堯之治必欲正主決

而去之之事則反危矣危謂於時未宜於勢未易也

上九為履之兌視履象也居履之終人皆視其所履

上故曰

考祥其旋

占之事也人之行莫大於孝養生之

乾父之終父死稱考祥者父喪既終之時也旋反還也

居喪在外旋者祥後復寢之時也視其所履於親之終

者當視其所

元吉

占也三年之喪盡禮可謂能慎終矣

履於喪之終

上九

陽剛健極故能強有力以終喪

此大善之人
所履之吉也

六畫俱九六
為履之謙

經彖辭凡七字爻辭凡六十二字啞徒結切眇
妙小切跛波我切慙山革切註飯糗上字晚切
下其久切其樂音洛使令來丁切當去可去去
之竝起呂切共音恭朝音潮未易以豉切之行
下孟切養
生于尚切

䷊ 乾下 一之八上之七經
坤上 ○ 三陽辟主九三

泰 此義皇乾下坤上之卦而文王名之曰泰三陽長出
地上六陰已消其半夏正正月之卦也泰者流通无

滯之謂天氣下降地氣小往大來象也小謂陰大謂陽
上騰二氣交而相通也

皆來居內

吉亨

占也吉而又亨
占辭之極善者

初九

初之畫得九
為泰之升

拔茅茹以其彙

象也初九變為柔成
巽象茅茹茅根也彙

類也三陽為類茅雖不共本拔之則其
根相連而起初之以其類同進似之

征吉

占也三陽
同行而進

故吉也

九二

九居第二畫
為泰之明夷

包荒

象也色者古人蓋以茅葦之屬
包裹魚肉也凡易中言包者皆

謂陽畫荒與盛通血也九二變為柔互坎之陽畫為血
九三陽畫在外包之郊祭天神燔柴之後最先進血禮
記曰郊血至敬不饗味而貴氣臭也包盛謂包裹牲血
以進而達誠於天也二五正應五天之位也而陰上升
以交乎天二地之位也而陽下降以交乎地此禮所謂
升中于天饗帝于郊者陽象天神陰象下地主祭之人

二之交五必包裏祭天之血以達誠于上也。荒今依許慎說文及虞翻本作荒考象義當作盛諧聲字從省故云血其後傳寫訛荒用馮河不遐遺朋亡也。下去血而上加草則失其義矣。馮徒涉也河者流水之名遐遠也遺謂物有遺失亡去也九二剛變為柔二三互坎為水之流三四互震為足之動初二三成離雖有舟象然震足動於前而舟在其後為舍舟而徒涉之象九二實變而虛為失物之象不離本位不遐之象不遐而遺猶曰不遠而復也初陽在水之內不與同涉朋亡之象陽猛於進故其占為用之以徒涉河水則不遠而已有所遺得尚于中行也。失朋類亦皆亡去此戒其進之銳也。尚配之在己上者謂六五也。中行中路也五居上卦之中故曰中行其占雖朋亡於下而得配於上也。

九三

九居第三畫為泰之臨

无平不陂无往不復

象也泰至半矣慮其將變也泰

三四相易則變歸妹九三比六四故以二畫之相易取象泰之上體坤也若三四相易則三四互坎而平夷之坤變為險陂之坎矣故曰无平不陂陰往在外若四易三則往外之陰來復于內矣故曰无往不復程子曰三居泰之中泰之盛也物理如循環在下者必升居上者必降泰久必否故為之戒曰无常安平而不險陂者謂无常泰也无常往而艱貞无咎占也泰將變之時以不反者謂陰當復也艱貞无咎占也泰將變之時以无咎勿恤占也又戒以勿憂恤盖徒其孚于食有福也互

兌象食

六四為泰之六居第四畫翩翩飛象也翩翩飛而向下也小過有

翼翼在兩旁而身在中也泰六四變為剛三四五上得小過全體之半陽在下陰在上如鳥身投下翼飛于上而隨身不富以其鄰象也其占為雖不富而能以其鄰以下也求陽故四趨下而不戒以孚象也四孚于其鄰鄰亦應鄰皆肯從之也以其所孚之鄰同下

六五

六居第五畫為泰之需

帝乙歸妹以祉

象也帝乙商王也六五以柔中應在下之

剛中帝女下嫁從夫之象泰卦互體及卦變皆成歸妹卦故以歸妹為辭祉福也以祉言將其寵祿以歸夫家也祉指四上二陰而言六五下嫁九二而二陰從之也朱子曰帝乙歸妹之時嘗占得此爻凡經以古人為言如高宗箕子之類皆故此澄案他書載湯嫁妹之辭云云其辭雖善要是後世好事者假託為之或乃因是遂

指帝乙為湯而謂非受辛之父者惑矣

元吉占也

上六

上之畫得六為泰之大畜

城復于隍

象也掘隍取土以築城隍陷入地中隔絕不通耦畫

似之城高出地上連亘不斷奇畫似之上城也三隍也泰之上其畫耦而為坤體是城之高者平矣泰之三其畫奇是隍之虛者實矣故為城土

勿用師

占也上六變為剛則坤體

類圯復還舊處填塞其隍之象

不完眾散邑削故勿宜用師

自邑告命貞吝

占也邑既削矣兌口在四不比不應威令不行

乃自邑而告之以命欲用其眾如是正主事則吝也

六畫俱九六為泰之否

經彖辭凡七字爻辭凡八十七字亢舊本作荒彙音胃註盛風黃切去血起呂切故封廣切好

事虛
到切



乾坤下
○ 八之一上之七經
三陰辟主六三

否

此義皇坤下乾上之卦而文王名之曰否三陰長出地上六陽已消其半夏正七月之卦也否隔塞也與

病痞之痞同義天氣上而不下地不利君子貞占也君子道消

氣下而不上二氣不交而隔塞也
故不利大往小來象也三陽皆往居外三陰皆來居內也

初六

初之畫得六拔茅茹以其彙象也三四五互巽為茅初二柔畫皆茅之

茹也泰之三陽以其類同進否之三貞吉亨占也正主

陰亦以其類同進故象與泰之初同事者吉而

亨也

或曰泰之三陽竝進君子之類也其占征吉宜矣

否之

三陰竝進小人之類也其占正主事亦吉亨何也

曰君子之有小人猶夫之有婦陽之有陰豈能絕其類哉唯艱其進遏其盛不使之勝善類而害治道斯可矣
小人者治世之能臣亂世之姦雄也自古治世為君子分憂任勞者固亦有亂世之姦雄特世治黨衰則不能為惡耳方否之初陰以類進聖人不遽絕之也初與九四正應奉承君子固可以吉且亨也誘之趨善俾天下无棄人聖人之仁也貞者以正主事也不能改心易慮以從君子烏能以正主事哉而何吉亨之有

六二

為否之訟

包承

象也承當作胥牲之正體也古字通用故作承六二坤體為牛

牲居中為正體與九五應以九五之陽包之也小人當否而求通豈能守道俟命唯以包苴饋遺為事而已曲

禮曰以包苴簞筭問人莊子曰小人吉占也如象所云小夫之知不離乎包苴竿牘小人吉占也如象所云

吉大人否亨

占也大人謂九五九當五之時則能休否而吉在二之時雖未出乎否然守道俟命

豈肯妄為以求通故
身雖否而道則亨也

六三

為否之遯

包羞

象也羞者臠哉膾炙醢醬之屬
食之加品非食之正品也六三

亦牛牡然位不居中又不得正非牲之正體也故象羞
九四之陽在外包之以包羞遺人而其遺非正饌又非
中正之二
可比矣

九四

為否之觀

有命

占也有命與師上六大君有命
同三四五互巽為命以剛健之

才居近密之位受君命
之寵委任以濟否者也
无咎
有君之命得展其才以濟
時故
疇離祉
占也疇類也離附麗也疇謂陽之類指三
无咎
陽言祉謂陰之福指三陰言四受命於君
行其濟時之志故三陽皆將出乎否三陰
皆將順乎陽是陽類同受陰祉之附麗也

九五

為否之晉

休否

象也人依木旁以息曰休三四

得休息九五陽剛中正之大人如木有莖蔭可依
故在下者依其莖蔭以休息於否將變之時也

大人

吉

占也否將變而得以休
息惟大人為可依故吉

其亡其亡繫于苞桑

象之戒辭也

其者慮其將然之辭亡去失也與馬匹亡及莊子俱亡
其羊之亡同苞叢生也大人者安不忘危故於否既可
休之時其遠慮深戒如有一動物在此未至於亡也而
恐其亡曰其亡矣其亡矣其繫之于苞桑乎諸木之中
桑之根最深固而又叢生則固之甚也蓋惟恐繫之不
固而或至走逸慎之至也程子曰否將反泰不可便為
安肆當常虞否之復來聖人之戒深矣漢
王允唐李德裕不知此戒所以致禍敗也

上九

為否之萃

傾否

象也傾猶倒也否者泰之反體
坤下乾上為否反而倒之則乾

在下坤在上而為泰矣故曰傾否泰過半則泰將變至終則泰反為否否過半則否將變至終則否反為泰四之時否可祉而未能休也五之時否已休而未能傾也上九否之終則反而傾否既傾則轉而泰也程子曰極而必反理之常也然反危為安易亂為治必有剛陽之才而後能故否之上九能傾否屯之上六則不能變屯也

先否後喜

占也占者先之時猶否後之時則喜也

六畫俱六九為否之泰

經彖辭凡十字爻辭凡五十八字舊本卦名下有之匪人三字朱子曰疑衍文由比六三而誤也今從其說註為君子為云偽切胥諸仍切饋遺云偽切知音智離力智切臃黑各切截則四切炙之夜切可比補履切復扶豆切



離下 ○ 三之一上之八緯
乾上一陰姤變主六二

同人于野

此義皇離下乾上之卦而文王名之曰同人
同人者同心同德之人也六二九五俱以中

正居人位而相應六二為九五所同之人故曰同人卦
名連彖辭象也人目所望地連天際處為野六二在下

居乎地也上應乾五應亨占也六二卦主而乾
乎天也故曰同人于野五為應故能致亨利涉大

川占也初二三有舟象乾健前行而利君子貞
舟隨其後故以涉大川則利也利君子貞占也二

相應其相同者皆君子之正
道故利於君子之正主事也

初九

初之畫得九同人于門象也同人謂六二乃九五
為同人之遜同人于門所同之人也初九變為柔

成艮門闕之象初者時之初同人自姤无咎占也於初
而變六二自初往二猶自門而出外也无咎而出門以

就同己者
非有咎也

六二

為同居第二畫

同人于宗

象也宗如宗子之宗六二為一卦之主猶宗子為一

族之主也凡宗者各有所宗非天下為公之同也六二以中正應九五同乎九五而已他无與同者是六二之為同人不過于其吝占也程子曰同於所繫應是有所同宗之人而同也吝偏與在同人之道為私狹故可吝

九三

九居第三畫為同人无妄

伏戎于莽升其高陵三歲不興

象也

離之戈兵為戎九三變為柔互震上畫互巽下畫為有草茅竹木之處故曰莽又互艮中畫山之半也故為陵義與丘同下卦之上故為高伏者伏于四之下升者升于二之上三震數項氏曰伏戎于莽處下卦也升其高陵望上卦也程子曰卦唯一陰諸陽皆欲同之二中正與五相應三與之比欲奪而同之然理不直義不勝故

不敢顯發伏藏兵戎于林莽之中負不直又畏懼時升
高陵以顧望至三歲之久終不敢興既不敢發故不至
也凶

九四

同居第四畫為

乘其墉弗克攻

象也墉城垣也離中虛外周象墉九

三為六二之墉將攻而取之然二之應五正也四亦欲得六二
乘二之墉將攻而取之然二之應五正也四亦欲得六二
應非比其攻之為无名而逆理甚矣二雖弱而直四雖
強而不直始有攻之之意終以義之不可故弗克攻而
止項氏曰凡爻言不克者皆陽居陰位訟之九二九四
同人之九四是也唯其陽故有訟有攻唯居陰故不克
訟弗吉占也程子曰知不直而不攻畏義而能改其吉
克攻吉宜矣澄案三之伏戎四之乘墉或竝以為抗五
或竝以為侵二或謂三欲侵二四欲抗五以爻義考之
皆非也夫陽之得陰陰之從陽者以其應也以其比也

姤之初六正應九四而九二與比者得之同人六二若非以中正與九五同則不保其不為姤之初六矣九三不慮六二之不從己唯忿九五之能得二故不急圖二而專以敵五為心晉文公一戰勝楚諸侯之從楚者自不能不從晉九三非能如此也而謬計妄想蓋欲如此九三與九五度德雖殊度力猶頗相等均之為以剛居剛故也若九四之以剛居柔則力非能抗九五者矣故不敢咎五而徑以攻二為事晉悼公與楚爭鄭不伐楚但伐鄭鄭不能支而楚自不能與爭九四非能如此也而輕舉妄動蓋欲如此然三之於五卒不興者以勢之不敵而不敢也故僅可以免凶四之於二卒不攻者以義之不克而不為也故猶可以獲吉

九五

為同居第五畫

同人先號咷而後笑

象也同人亦指六二號大呼也

咷哭也號咷者離火之聲笑者兌口之說也六二往應九五而厄於九三之強鄰其先六二在離火炎焚之中

而號咷其後與九五相遇九大師克相遇象也同人六五變為柔則成兌口而笑矣大師克相遇畫俱變則成師師以坤為衆坤衆自乾陽而變故為大師九三之強必時事俱變以大師克勝之然後二與五得相遇也

上九

上之畫得九為同人之革

同人于郊

象也初九六二九五所稱同人皆謂六二蓋六二者

一卦之主為九五所同之人此爻所稱同人謂九五蓋九五者與六二相同之人也郊謂國門之外凡卦初上二爻有擬之以人者有但言其時者此卦之初上是也二五為心德相同之人三四為爭奪六二之人此四爻各擬之以人者也初九但言時之初同人于門以六二在初之時而言也上九但言時之終同人于郊以九五在終之時而言也此二爻不擬之以人者也九五與六二以中正相同然可與同者止有六二而已虞有八元八凱周有亂臣十人下至中林置鬼之夫猶可以為公侯之腹心何其同者之多也漢昭烈僅得一孔明猶魚

之有水何其同者之寡也乾九中而居五則六二為應
終而在上則下无應與如出在國門之外環視四顧无
一可與无悔事措天下於大同之治而亦可无悔也共
同者矣

六畫俱六九
為同人之師

經彖辭凡十三字爻辭凡六十一字莽莫黨切
號户高切咷道刀切註夫陽音扶勝楚升正切
度符洛切
頗匹可切



乾下
離上
○一之三上之八緯
五陽爻變主六五

大有

此義皇乾下離上之卦而文王名之曰大有大謂
陽有者盛多之義繫辭傳云富有詩小雅云旨且

有釋者謂有猶多也卦以大名者四大有言大者多有
也大畜言大者藏畜也大過言大者太過也大壯言大

者盛壯也此卦一陰居尊為主而五陽具備故曰大有舊說謂陽為陰所有非也

元亨占也

初九

為大有之鼎

无交害

象也交如朋友之交无交如文言傳所謂无交而求孟子

所謂无上下之交者初九无應而遠於所主故曰无交害者利之反也謂所求不利匪咎艱則无

咎

占也其害也非己之過咎所處之地然爾能艱難則可无咎上无交契前有剛間不可慢易也

九二

為大有之離

大車以載

象也坤為大輿其畫耦而虛大有之下體乾也其畫

奇而實猶坤之大車而以載實其中也

有攸往无咎

占也剛健勝重故有所往则无咎言无覆

憂也

九三

為大有之睽

公用亨于天子

占也言諸侯筮得此爻而用之以享于天

子也享備物以獻也凡諸侯朝覲天子先朝而後享朝者禮之重享者禮之盛案覲禮先執圭以覲後乃備物三享也蔡氏曰公三也天子五也居下之上故稱公進近乎五故有享于天子之象小人弗克也占小人筮得此爻則弗克承當不宜用也

九四

九居第四畫為大有之大畜

匪其彭

象也彭者作樂聲容之盛也大有者陽之盛多唯初

九處下无交不言其盛九二大車重載則盛矣九三備物享上則又盛矣九四在三陽之上以陽息之卦言之則為四陽之大壯盛之至也物忌滿盛九四離體能明此理居柔不過於剛不自處以盛者也故曰匪其彭无咎占也當盛之時不處其盛故无咎

六五

六居第五畫為大有之乾

厥孚交如威如

象也六五以柔中下應剛中之九二其孚

信於九二如物之交合固而不可解又得吉占
九二之剛以濟己之柔故有威如之象

上九上之畫得九為自天祐之象也六五者一卦之主
大有之大壯

終言卦主之盛四陽在六五之下者皆應之矣上九一
陽在六五之上而亦應之上天之位也上一陽之應五
是天之吉占无不利也
祐五也

六畫俱六九
為大有之比

經彖辭凡四字爻辭凡六十字載才再切亨香
兩切彭陸氏步郎切又如字註剛間居限切易

以豉切勝重
音升朝音潮

䷁ 艮下
坤上 ○ 七之八上之九緯
一陽復變主九三

謙

此義皇艮下坤上之卦而文王名之曰謙謙者屈已下物也艮山之高而在地下是貶抑其尊甘處物下

也坤地之卑而在山上是推遜卑者使居已上也內亨止則退已而不進外順則讓人而不爭所以為謙也

占君子有終占也其占既能致亨矣若君子筮得此卦也

而有終也九三為一卦之主君子蓋指九三言之

初六為謙之明夷謙謙象也陰柔處至下謙而謙者也君子用涉大川

吉象也君子筮得此爻而用之以涉大川則吉也初六變為剛初二三成離有舟象坤順在上前无阻隔故

吉柔變而剛故曰君子

六二為謙之升六居第二畫鳴謙象也三四五互震為雷雷有聲

互震之下畫謙在中
而鳴聲發於外也
貞吉 占也中正故
正主事則吉

九三 為謙之坤 畫 勞謙 象也震動者勞之象有功勞而
能謙如周公是也顏子之願无

施勞抑 其次與 君子有終吉 占也與彖同九三一卦之主彖辭
之占以九三言之也筮得此爻者

其占如彖又加一吉字
以明其占之極善也

六四 為謙之小過 無不利 占也順而得正上而 撝謙 象

撝如手之撝下有艮手為撝示其謙於下之象六四固
能謙矣然以无功而處九三有功者之上故施布其謙

以示下盖居三之
上而不敢自安也

六五 為謙之蹇 不富以其鄰 象也象與泰六四利用侵
四同鄰謂六四

伐占也不名其罪而加兵曰侵聲其罪而致討曰伐六

五變為剛

三四五成離有戈兵象故其占利用之以

而乘君位非能謙者故侵伐之朱子曰自初九積到六

五謙亦極矣自宜人人服之猶有未服者則利侵伐也

或問謙不與人爭如何言侵伐朱子曰老子言抗兵相

加哀者勝矣孫子言始如處玄敵人開戶後无不利也

如脫兔敵不及距大抵謙自是用兵之道

朱子曰於他事亦无不利也項氏曰三以獨陽為萬民

所服已下人人亦下已故止於謙无所復為五以陰柔

居尊位已雖隆謙人未免有不謙者必用侵伐以一之

帥眾謙以攻少不謙不謙者去則天下皆謙故无不利

不富以其鄰不待賞而服同謙者也利用侵伐待

刑而後服不同謙者也二者皆服则无不謙矣

上六

為謙之艮鳴謙象也鳴者以震之一陽由中而鳴其謙

於外上六下應震之一陽自上而鳴其謙於下由中發乎外而鳴者情也自上達乎外而鳴者不情也上六以柔居柔順體之極宜能謙矣然志欲自伸於一陽四陰之上非能屈己下人者也其鳴謙也特畏九三而為是聲音以利用行師征邑國占也謙之二三四五也行師謂師行媚之爾在道震為大塗行之象坤邑國之象邑謂天子畿內詩曰商邑翼翼四方之極邑國畿內之國也畿內大國皆王之三公出封封于疆地爵以上公上畫於一卦為最遠外於六位為最高上故象王畿大都所封上公之國也上六應九三乘六五能謙於剛強之臣而不能謙於柔順之主當謙之時虧謙之道故宜用師以正其罪邑國者上六之國也征者王命帥師之臣征之也如春秋時王師伐號之類舊說以為上六自征其邑國非矣所征之邑國即六五之所侵伐者據六五出命而言則曰侵伐據上六在國而言則以行師至其國而正其罪為

義故曰行師
征邑國也

六畫俱六九
為謙之履

經彖辭凡六字爻辭凡五十八字為毀皮
切註次與音余復為扶豆切去起呂切



坤下

○

八之四上之九緯
五陰剥變主九四

豫此義皇坤下震上之卦而文王名之曰豫豫者暇而
樂也以卦德則內順外動凡人從容和緩順序以動

則先事詳審故事成而樂若非先事蚤圖匆遽紛擾而
為之則事未必如意何樂之有以卦象則雷出地上陽
氣伏藏地中非一日矣一陽二陽至三陽上達於地之
後雷始發聲故其聲和樂諸儒皆曰豫者樂也而不可
先時而暇毛氏璞謂豫當訓先釋為安逸者非范氏大
性因此遂專以前定釋之二說均之為偏中庸云事豫

則立以前定則不路不因不疚不窮也前定者先時而暇也不路不因不疚不窮則如意而樂矣象傳於既濟言豫防固取先暇之義序卦傳言以喜隨人亦取喜樂之義合二說為一其義始備利建侯行師占也鄭氏謂建侯震象行師坤象然坤為震侯之國震為坤衆之帥

初六

為豫之畫得六

鳴豫

象也應震之一陽而鳴其喜樂以上達于九四九四以一陽為

卦主五爻之豫皆由之初六陰柔不正喜其獨為九四之應故其發於聲音者如此朱子謂小人有強援是也凶也占

六二

為豫之解

介于石不終日

象也介如介乎大國之間之介加田為田

之畔其義同石謂九四剛而在坤地之中也艮為小石之在山上者也坎為石石之在地中者也三四互

坎石也二與三接界介于石也六二變為剛則成離日
三為人之位下履乎地離日在三日將至地之時也故
三為終日不終日不至于三也九四豫之主人皆趨附
獨六二不與之比應退而以中正自守不待至三而能
早疏遠之蓋至三則已與之比矣此君子見幾之
早不以進附權勢為樂而以退守中正為樂也 貞吉
也占

六三

六居第三畫
為豫之小過盱豫

象也盱上視也六三不中不正
上視九四而豫以趨時附勢為

樂者

悔遲有悔

占也上悔字改悔之悔教戒辭也下悔
字悔吝之悔占辭也如六三之不能自

守速宜改悔若改
悔之遲則有悔矣

九四

九居第四畫
為豫之坤

由豫

象也由如路之可由震為大塗
二三四互艮為徑路可由者也

豫自剝而變上來易四卦大有得也占也徐氏幾曰大剛之所以為豫者由九四也

曰大勿疑占之教戒辭陰多疑朋盍簪占之象也朋謂有得居陰故戒之以勿疑

筭也所以收髮九四一剛貫衆柔之中一簪貫衆髮之象也大有得者言一剛之得彼衆柔也朋盍簪者言衆

柔之合此一剛也九四固能合衆柔矣又勿疑則衆柔皆歸心焉

六五為豫之萃貞疾占也與貞凶貞吝貞厲之例同

歸也六五以柔弱處其上正主事則恒不死象也恒常

如疾之人厭厭不振無能為也已恒不死象也恒常

死如周衰之時權歸霸國周雖微弱而亦久存也

上六

為豫之畫得六

冥豫

象也上居天之上杳冥之閒

成

有渝

象也成謂以和好相結約也如春秋傳求成之成渝謂改變如渝盟之渝成有渝者既成矣而又有

改變也五柔同豫如諸國之結成上六變為剛則同者

異矣渝其成也楚辭曰初既與予成言兮後悔遯而有

他成有渝之謂也

无咎

占也處豫之極當改變之時也既極而變則无咎矣

六畫俱六九為豫之小畜

經彖辭凡六字爻辭凡五十一字盱眙于切盍

胡閣切簪側森切註樂音洛從千容切忽初崇

切路其切劫切疚見舊切帥所類切援于願切畔

皮半切疏新鉏切筭音雞厭因兼切和好虛到

切



震下

○

四之二上之十

陰否變主初九

初九

隨

此義皇震下兌上之卦而文王名之曰隨隨謂從於人也卦自否而變三陽三陰否隔不交今一陽來初

而下卦二陰隨之一陰往上而隨上卦之二陽以陰從陽故曰隨

元亨

占也元者九五初九二剛之德

利貞

占也初九為卦主而得正九五居尊位而中正是德之元能致亨而利於貞

无咎

占也

德能致亨利於正主事者則有人隨之所以无咎

初九

初之畫得九為隨之萃

官有渝

象也官統治人者初成卦之主以震之一君統二民為二

之官故二以近比而隨之私係爾非正應之隨也初貞雖无應渝則變為坤以柔順應四而為正應之隨矣

吉

占也去係就應正主事則吉也

出門交有功

象也二三四互艮象門交謂四初出門往應四

四得其助是於所
交之友有功也

六二

六居第二畫
為隨之兌

係小子失丈夫

象也程子曰二應五
而比初初陽在下小

子也五正應在上丈夫也二若志係於初則失九五之
正應隨先於近柔不能固守故為之戒云若係小子則
失丈夫也

六三

六居第三畫
為隨之革

係丈夫失小子

象也丈夫謂九四陽
之在己上者也小子

亦謂初九二之以五為丈夫者正其夫也三之以四為
丈夫者非其夫也三无應无夫之婦也四亦无應无婦
之夫也无夫之婦近於无婦之夫而隨之遂以為夫此
三之係四所以謂之係丈夫也初者三之君也否上一
陽降處於初震之二民皆隨之者六三係四失初是隨
不正之夫而不隨其君也故曰係丈夫失小子係謂不

當隨者乃牽於私情而隨之失謂所隨有求得之象也隨當隨者乃違於正理而不隨之也

猶三從人也三為四之隨兩皆无應四之與利居貞也

三者其情專故三之有求於四者无不得也

占辭盖因象辭之有善而示教也能知靜處

以正主事之為利則必不係四而有所求矣

九四為隨之屯畫隨有獲象也隨謂六三三為四之從

則必得盖不可矣又倚勢貪利不待求四而自貞凶也

有獲尤不可也獲謂攫取財物如獵取禽獸然貞凶也

初九舍私係之陰則貞吉有孚占也謂有在道以明也

九四昵私係之陰則貞凶初九之孚在道以明也

在道謂行而在路震為大塗道也以如以其鄰以其彙

之以明謂賢明之人即初九也九四初九其位相應雖

皆陽剛有相求相與之理初上孚於四四履震塗之何

上而與震下一陽同位如在路以賢明之人隨行也

咎占也四剛而不正資初之匡救裨益以初之正正其

隨從則何咎人可不慎其所與哉四居陰故或與六三九體陽故能交初九

九五為隨之震

孚于嘉

象也有孚者彼孚于此單言孚者此孚于彼嘉美也謂六

二昏曰嘉禮妃曰嘉耦六二為五之正應配

吉

占也中正相應

吉故

上六為隨之无妄拘係之乃從維之

象也拘謂繫繫其手係謂聯綴之維

謂四旁羅絡之凡維係之象取諸坎皆陰畫維係於陽也隨之三四五上肖坎卦變上六一陰自初往上而隨上卦之陽上居隨之極其隨於五也固結而不

可解如既拘繫又係縛之矣又從而四維之也

王用亨

于西山

占也王筮得此爻而用之以祭享于西山也王謂九五西山岍隴諸山其尊者吳嶽在正西兌

方又地祇陰神也故兌之陰畫為西山拘係維之象陰之固結其志於陽也享西山之占陽之升達其誠於陰也

六畫俱九六為隨之蠱

經彖辭凡七字爻辭凡七十一字亨香兩切註從人才縱切下隨從同攬俱縛切舍私音捨昵寧的切妃音配孿來全切繫之泣切綴真歲切岍音牽

䷋

巽下艮上 ○五之七上之十緯三陽泰變主初六

蠱

此義皇巽下艮上之卦而文王名之曰蠱蠱者事之蠱壞卦自泰而變初上相易內剛外柔為泰泰之後

剛往居外而不復有為柔來
居內而無能為所以蠱也
元亨 占也有元德者治蠱

弱居下亦可謂元而能致亨乎曰初六才雖不足然當
蠱之初牽補支吾俾不至大壞以俟九三之君用事而

治蠱此亦初六之元而九三遂能致
亨於後者不可謂非初六之功也
利涉大川 占也蠱

可靜俟當往濟險難
而三四五上有舟象
先甲三日後甲三日 占也此筮日

紀元鼎五年詔曰先甲三日後甲三日丁酉拜況于郊
註云先甲三日辛也後甲三日丁也曲禮云內事用柔

日辛丁皆柔日也蠱之主爻初六為東方甲乙故
先後自甲而數初二三巽納辛二三四互兌納丁

初六 為蠱之大畜
幹父之蠱 象也蠱之為卦父歿母老
子幼女長之象也泰之乾

為父坤為母乾父自初往上成艮父歿而有少男也坤
母自上來初成巽母老而傳家事於長女也父義兼取

互卦故初六幹父之蠱者巽女也九二幹母之蠱者兌女也九三幹父之蠱者震男也六四裕父之蠱者艮男也家之二女二男巽女為長兌女次之震男又次之艮男最幼故其出而任事也有先後卦位之尊者五與上也五陰為母上陽為父上陽自乾往而居陰父之已亡者也五陰坤之中畫而居陽母之猶存者也幹者木之正身又為築墻之木文言傳云貞者事之幹也凡有智有力能成立其事謂之幹初六巽之下畫長女也為成卦之主乾父既往家事蠹壞震子未能任事有子考无巽女最長而主其家故先出而當治蠱之任

有子考无

咎占也言考者見父已亡也家之蠱豈巽女之柔弱所能辦必有震子陽剛之才然後足以補弊救敗而考

咎无厲終吉占也以柔弱處艱難危矣然姑少俟

爾震子成人而能當家則終於吉也

九二

九居第二畫為蠱之艮

幹母之蠱

象也九二互兌之下畫少女也剛而得中女之能而

賢者與六五應六五坤體母也父歿母老震子未能承家巽女居長暫攝亡父所遺一家之事允女居次專任寡母所治一身之事服勞不可貞占也女雖能且賢居奉養其母故曰幹母之蠱中奉母其職也不可以正主事貞謂正主一家之事也以此坊民猶或有呂武兆晨之妖若初六之長女代長男蓋遺家之難權時之宜暫焉而已於理則不可也

九三

九居第三畫為蠱之蒙

幹父之蠱

象也九三互震之下畫長子也以剛居剛而在巽體

有智有力而能權者也至下卦之終始出小有悔占也而任事才足以幹父之蠱者獨此爻而已陰謂九三若變為柔則有悔矣蓋蠱非剛強不能濟也无大咎占也大謂陽大咎謂以陽剛致過咎也九三不變為陰柔但為陽剛則必无陽剛之咎

六四

為蠱之鼎

裕父之蠱

象也裕饒益也六四艮之

柔弱不能拯救父之蠱但以裕處之

往見吝

占也僅可止而自守若往而有為則不勝其任而見吝也

六五

為蠱之巽

幹父之蠱

象也泰未變蠱則六五為

五為艮之中畫故六五為母又為少男之依乎母者六四以陰居陰才既弱而志亦弱蓋艮男方穉未能如六五之時也故以无能而裕父之蠱六五以陰居陽才雖弱而志稍強蓋艮男漸長已勝於六四之時矣故亦有為而幹父之蠱用譽占也六五柔剛適中善事其母而追孝其父以此用事雖未必有實功而可有虛名也

上九

為蠱之升

不事王侯高尚其事

象也少男長女為蠱蓋以象家

事之蠱壞諸爻皆以父母男女取義自初六至六五同一意也上九乃父之既死而以蠱事遺後人者然斯義也下五爻言之已詳故上一爻別發一義陽剛止於艮山之上賢人高舉遠遜之象夫蠱者必有事也仕於君者事其事賢人止而不仕則天子不得臣諸侯不得友而不事王侯之事矣王五也侯三也上九居與五比而不相係位與三應而不相應故曰不事王侯凡處世間而有為者皆卑下之事唯出世間而無為者乃高尚之事也尚上進上九在一卦至高至上之位故曰高尚下五爻屑屑於一家之事至此則一國之事天下之事猶且視為卑下而不屑為彼一家之事又何足道哉

六畫俱九六
為蠱之隨

經彖辭凡十五字爻辭凡六十二字先悉薦切後去聲註不復扶豆切而數所主切女長之兩

切少男詩照切下竝同言傳直戀切見父賢遍
切少俟如字奉養羊尚切坊音防之難乃旦切
咸殺沙界切穉直二切不勝
音升已勝去聲夫蠱音扶



兌下 ○ 二之八上之十一
坤上 緯二陽辟主九二

臨 此義皇兌下坤上之卦而文王名之曰臨二陽長而

陽浸長於下而陰居元亨也占利貞占也占與乾之彖同

上臨之以俟其進也 陽而至于八月有凶 占也自天正建子之月一陽始生

進也 臨其七建午之月一陰始生為姤至其八建未之月則

二陰長而為遯遯者臨之正對臨卦六畫變盡也今日
二陽之臨陽長而消陰也至于八月二陰之遯則
陰長而消陽矣故其占為至于八月則有凶也

初九

為初之畫得九

咸臨

象也初二之陽長於下而四五

豈可以臨君也哉凡易於陽上陰下者以尊卑定分取

義天地之否夫婦之恒是也陽下陰上者以往來交感

取義天地之泰夫婦之咸是也咸交感之義艮男當居

上而反居下兌女當居下而反居上所以為咸治世君

民上下之志通亦若男女交感之咸咸之初二二陰升而

而下接於民則為臨之初九九二咸之初二二陰升而

上達於君則為臨之六四六五此臨之初二二爻所

以謂之咸臨初與四應咸之九四下降而為初九也貞

吉

占也

九二

為九居第二畫

咸臨

象也二與五應咸之九五下降

皆臨陰者也以陽臨陰反在陰下有男下

女之象故皆為咸夫之臨婦其道如此

吉

占

无不利

占也

六三

為臨第三畫

甘臨

象也六三互坤之下畫坤土味甘兌口柔說以言媚人陰柔不

正下臨浸長之剛勢將逼已无攸利占也柔說宜足以而甘言以媚說之故曰甘臨无攸利禦陽剛之進哉雖甘亦无既憂之无咎占也三雖臨二剛之上而未離下所利也既憂之无咎體既能以剛進之不可遏為憂而安於處下不敢以賤臨貴斂藏退避以俟剛之上進則可无咎項氏曰六三以甘媚臨而无攸利見君子之難說也既憂之无咎又見君子之易事也其處已也嚴故不受不正之媚其與人也寬故不治既憂之人爻辭雖為六三言之然亦可

以見二陽之用心矣

六四

為臨第四畫

至臨

象也四五二爻皆以剛臨柔取義至者鳥飛自上而極於地也

初之剛本居四自四而降以下接於初而初為九所謂至臨也四之柔本居初自初而升以上達於四而四為六此民情上達之象无咎占也六上達非六本居於四也於四故无咎

六五

為臨第五畫

知臨

象也剛為智柔為愚五柔而智何也曰五非柔也剛也五之剛

下接乎二二之剛即五之剛也五剛下二是君之智下燭民間也此堯之清問下民也所謂聰明睿知足以有臨者故曰知臨然則六何以居五也曰六非五也二也柔自二而上升于五五之柔乃二之柔也二柔升五是民之情上達君所也大君之宜吉占也大者剛畫也君此堯之鰥寡无蓋也大君之宜吉者五位也九五大君也六五非大君也此六五而曰大君明六五本是九五也因五之九降二而二之六升五也六民也非君也六而在五之位民之上達於君也民之得上達於君由君之能下逮乎民也君民一體上下志通大君之臨民宜

如是故曰大君之宜所以吉也

上六

為臨之損

敦臨

象也敦厚也坤之上畫地之最厚處天高而覆物者以上臨下

也地厚而載物者以下承上非臨也上六陰柔居高臨下然以坤厚載物之德臨之以俟二陽之進而非敢以柔臨剛也在上而不以高自居厚之至吉也无咎占也故曰敦臨此爻取義乃臨卦之正意

六畫俱九六為臨之遯

經彖辭凡十二字爻辭凡四十八字知音智註浸長知兩切下同定分符問切柔說音曰下同未離來至切易事因利切雖為云偽切覆孚豆切

䷁

坤下

八之五上之十一
緯四陰辟主六四

觀盥而不薦

此義皇坤下巽上之卦而文王名之曰觀四陰長盛消陽已過其半夏正八月之卦

也觀以目視物也二剛在上四柔在下仰觀之此四陰

消陽之卦聖人名卦但以下觀上取義卦名連彖辭與

履同人艮三卦同例舊以卦名自為句者非也象也盥

潔手也字從左右二手從水從皿以水沃手而以皿盛

其餘水也三四五互艮為手上一陽在手象沃手之

水下二陰在手象盛水之皿薦進也進祭物以獻神

也下體坤為牛象所薦之牲下之所觀莫大於敬上之

所敬莫大於祭盥者祭之始薦者祭之盛觀盥謂觀其

盥也不薦謂不觀其薦也敬之感人其應甚速觀祭者

但觀於其初盥之時不待觀於其既薦之後而已感應

矣項氏曰相觀而化其神如此先儒謂盥則誠意方專

薦則誠意已散仁人孝子之奉祀也豈皆至薦而誠散

乎有孚占也謂下四

顯若占之象也顯仰首而望之貌

大定日吉金書

易纂言

四十七

敬而有孚者已顯若矣
謂其感應之神速也

初六為觀之益
童觀象也觀艮之複體艮少男為童
下之所觀觀九五中正之道也

初最下去五最遠如未有知識
之童子而觀不能有所見也
小人无咎占也項氏曰

日用而不知則君子吝
其常也故无咎
占也項氏曰君子而不著不察則可羞矣

六二為觀之渙
闕觀象也闕者窺門也三四互艮
為門闕二在其內猶女子不能

出外在門內而窺觀門外其所見狹矣二與五應而陰
柔不能見遠故如女子之闕觀初居陽象男童二居陰

象女利女貞
占也朱子曰丈夫
得之則非所利矣

六三為觀之漸
觀我生進退
象也凡彖辭爻辭稱我
者皆謂卦之主爻蒙九

二為主爻彖辭匪我求童蒙我謂九二也凡息卦消卦十有二一陽一陰之卦初為主二陽二陰之卦二為主三陽三陰之卦三為主四陽四陰之卦四為主五陽五陰之卦五為主六陽六陰之卦上為主觀四陰之卦故六四為主爻我謂六四也生猶生之謂性之生謂其身之動作也六四巽之下畫巽為進退四陰進逼而消陽六四為之先初六六二遠弱未有凌陽之勢六三居下卦之上居剛而不中正與六四同惡者也然雖陰盛之時而陽剛中正之君在上六四逼近九五者方且臣順則六三豈能獨進故比於六四惟觀六四之動作而為進退爾六四進而凌逼則六三亦隨之而進六四退而臣順則六三亦隨之而退諸家或以九五為觀之主爻蓋擇其德位之盛者為主非通例也

六四為觀之否

觀國之光

象也坤為國互艮有光象九五以陽剛臨坤土之上

國之光也六四入近君側下觀坤土利用賓于王占也

之廣上近天子之光故曰觀國之光
朝貢于王曰賓六四變為剛則成乾乾為賓四陰勢盛
進逼二陽幸九五能君故六四不敢不臣以強臣逼上
之勢轉為諸侯朝王之象筮得此爻者利用之以賓于
王也陰消陽之時而四當位得陰之正故有從順而无
跋扈項氏曰履正故為賓使其不正則為敵矣國
有光則賓无光可觀則敵當觀之時聖人懼焉

九五

九居第五畫為觀之剥

觀我生

象也我亦指六四而言陰盛消陽六四已進逼君側九五

不失君道則六四猶為臣九五一失君道則六四將不
臣矣當此之時九五但觀六四之動作如何以驗吾君
道之得失也
危迫甚矣
君子无咎
占也占本有咎君子得之則可
作使若非君子則御失其道而狙詐作敵斯有咎矣九
五以陽剛中正為下所觀而无吉占何也時則然也况

又變而為剝乎

上九

上之畫得九為觀之比

觀其生

象也其指上九而言謂自觀其身之動作

君子无

咎

占也陰長陽危自觀一身之所為果合君子之道與則自處得宜而可免于咎若不合君子之道則自處

失宜有咎必矣故其占惟君子則无咎也項氏曰上在卦外无民无位小人之進退下民之向背皆不由已但

謹視其身思自免咎而已觀本是小人逼君子之卦但以九五中正在上羣陰仰而觀之故聖人取之以為小人觀君子之象象雖如此勢實漸危故五上二爻皆曰君子无咎言君子方危能如五之居中履正上之謹身在外僅可免咎二陽向消道大而福小也

六畫俱九六為觀之大壯

經彖辭凡九字爻辭凡五十四字觀平聲篇內
並同盥音管顙魚恭切闐苦規切註盛其盛水

時貞切朝音潮跋蒲末切扈音戶
狙七余切道與音余向背蒲貝切

三三震下
離上 ○ 四之三上之十二緯
三陰否變主六五

噬嗑

也此義皇震下離上之卦而文王名之曰噬嗑噬齧

中頤口本合有物間之則不合矣故亨占也梗而未合

必齧噬其中之間而後上下合也亨則不亨噬而合

之則利用獄占也獄者有訟而拘囚於獄也離體中虛

亨矣利用獄之象六五柔中為卦主用於上以震動
於下治獄者也兩辭參差亦猶有梗於中而不合鞫問
而得其情則其辭一矣亦猶噬之而後合也故其占為
利於用之以治獄

初九

初之畫得九為噬嗑之晉

屨校滅趾

象也彖辭之占利用獄故初上爻辭皆因用獄取象

屨謂著於其足如納屨然校械也滅沒也猶浸在水中沒而不見也震下畫為趾初剛橫亘於震足之下足械滅沒其趾之象足械之制周圍其脛而已下不及趾也今械木之廣既圍脛而遮掩又過其脛并不見脛下之趾也入獄之初未加鞫問恐其走逸亦械其足雖屨校而滅趾然其人非必有罪也特桎之使不得去爾鞫問无罪則釋其无咎占也在卦之初為初犯得位之正則械而縱之矣无咎非有罪也鞫問明直而獲縱釋此人者足曾被械因是知所懲忒不復犯法故其占為无咎

六二

六居第二畫為噬嗑之睽

噬膚滅鼻

象也初上二爻既因彖辭用獄取象其中四人竝自

卦名噬嗑取象卦之全體象頤初上二剛象頤口上下斷齧有齒牙能噬者也其中四畫乃頤中虛而容物之

處故各象所噬之物二三五柔畫物之脆者四剛畫物之堅者二三五皆柔三五以柔居剛雖脆而堅二以柔居柔最為易噬膚者豕腹之下柔軟无骨之肉古禮別實於一鼎曰膚鼎二最易噬象膚又近初剛初為下頤之齧凡噬物下齧之動最有力以至近能噬之剛噬至柔易噬之物一舉盡齧略无留難以至所噬之膚掩過噬者之鼻也坎為豕二在互坎下畫之下象豕腹向下之膚艮為鼻二當互艮之下畫鼻之下端也正與所噬之膚相直故有**无咎**占也噬嗑在於去間所噬者易膚滅其鼻之象**无咎**噬是其間易去也故其占**无咎**

六三為噬嗑之離**噬腊肉遇毒**

象也腊肉之形下從日肉之日

乾者也其後假借為今昔之昔乃於左畔加肉以別之而為腊肉之腊非字之正也鼎實以兔之薨為腊鼎田獵所獲野物或獸或禽全體乾之通謂之腊彼單稱為腊此言腊肉非指野物全體之乾者而言蓋六三六五

二柔畫爻辭竝云肉謂无骨者也九四一剛畫爻辭不云肉而云肺謂有骨者也若以六三為全體帶骨之腊則與爻象不合六三互坎之下畫有離日在上豕肉受日之暎者肉者六之柔也腊之則柔亦堅矣位剛故也凡食物臭味之惡者為毒以上九之小吝占也小者策陽噬六三不中不正之陰故為遇毒小吝得此爻則吝也上九陽剛為大上古神農嘗百草一日數遇毒而不可害者大智大力能勝其毒也若小者遇毒則不能堪而可无咎占也大者噬之雖遇毒而不害故无咎

九四

為噬嗑之頤

乾肺得金矢

象也肺骨之連肉者在離體之內火所乾

也骨而又乾其堅至矣九之剛象之骨而連肉剛之居柔象之不期遇而遇曰得金矢鐵箭鏃也九之剛為金離為矢殺矢之金金三錫二金之雜錫亦猶骨之連肉皆九四以剛居柔之象也乾肺者九四也噬之者初九

也噬乾肺而乃於肺之中得金矢焉其堅又過於乾肺矣然金矢雖堅而可用堅者為梗所以噬之不為梗而反為用則雖利艱貞占也宜以艱難吉占也艱貞故堅可不噬也利艱貞之心正主事也吉初九所噬者九四與六二也六二近而柔以其易噬也初九以易視之僅能无咎而已九四遠而堅以其難噬也初九以難處之所

以吉也

六五噬嗑之无妄為噬乾肉得黃金象也六五互坎之

六三皆質柔而居剛象无骨之肉以乾而堅也六三在離日之下日所乾者故曰腊六五在離火之中火所乾者與九四同故曰乾黃者中央之色五居中故曰黃五變為剛故曰金凡單稱金者金銅銀錫皆金也唯曰黃金者為正色之金乾肉者六五也噬之者上九也噬乾肉而乃於肉之中得黃金焉其堅又過於乾肉矣黃金

雖堅然不為梗而可為用則雖堅可不噬也項氏曰四五兩爻稱得金者下卦為間尚淺故用力易上卦為間已大故用力難有噬有得者噬道將終必盡其慮也噬者除其惡得者取其善有惡則去有善則取憎而知其善也於九四則噬其乾肺之強而收其金矢之用於六五則噬其乾肉之強而收其黃金之用聖人之待強梗其仁貞厲占也上九位不當所噬雖无咎占也噬其梗如此貞厲占也上九位不當所噬雖无咎占也

所用之貴
貴故无咎

上九

為噬嗑之震

何校滅耳

象也何負也謂負之於首也上畫為首剛畫在上首

械之象三四互坎為耳首械之制周圍其項上不及耳今首械在坎耳之上是械之厚掩過其耳而耳不見也居卦之終蓋問獄已成以其有凶占也剛不正而在罪而首何至厚之械罪不可解矣凶終之時是終為惡

而受罪者也故凶噬嗑六爻分為二義初上兩爻於用獄起義蓋以六五為治獄之主初上為坐獄被校之人兩爻之占各指本爻而言初之无咎初九自无咎也上之凶者上九自凶二三四五於噬嗑間起義初九上九為噬嗑物之頤二三四五為頤中所噬之物兩爻之占皆指初上而言初比二而位應四噬二噬四者初九也六二之占无咎謂初九之无咎也九四之占利艱貞吉謂初九之利與吉也上比五而位應三噬三噬五者上九也六三之占小吝无咎謂上九之无咎也六五之占貞厲无咎謂上九之厲與无咎也雖筮者得之直據各爻之辭為占然聖人觀象繫辭之意則如此不可不知也

六畫俱九六為噬嗑之井

經彖辭凡六字爻辭凡五十八字噬市制切嗑胡閣切屨紀具切校爻教切腊音昔乾音干肺

茲此切何何可切註齧五結切間居限切後竝
同參七森切差七思切鞠恭曲切著步略切曾
秦登切忒音又復符后切斷魚斤切鰐魚各切
脆音翠易以豉切後同嚮劣遠切剔彼列切薨
苦老切嘆音漢數音
朔勝音升鏃子木切



離下 艮上 ○ 三陽泰變主六二 三緯

賁

此義皇離下艮上之卦而文王名之曰賁賁文飾也
字從貝諧卉聲貝水蟲背有文如錦故為文飾之義

卦自泰變二之剛往上文外亨占也內卦文小利有攸
二柔上之柔來二文內二剛明衆美之會

往

占也小謂陰也外卦剛止於上
四五二柔宜往上去求其文

初九

初之畫得九
為賁之艮

賁其趾

象也初畫在下為趾賁其趾
者屣屨之屬以飾其趾為行

計也舍車而徒象也二三四互坎為車徒步行也二之柔

舍二之車而自飾其趾以步行內飾於己而不資外飾於人剛正而明者能之

六二為資之大畜資其須象也三四五上肖頤六二在

美也美由中出不假外飾六二柔麗乎中正固有其美如須之資非有待於外物而資者然陰柔不能自動必附麗於陽如須雖有美必附麗於頤也六二卦之主也以一柔來文下卦之二剛初九自資而不受六二之資矣六二既自資又附麗於九三而為九三之資也

九三為資之頤賁如濡如象也九三者互坎之中畫

如濡謂所飾之文采鮮澤也處文明之極一剛在二柔之間錯雜成文故賁如又六二之柔飾之於下賁之最

盛者也。永貞吉。故濡如。永貞吉。占也得二之飾而不溺於二。故濡如。永貞吉。故長永正主其事則吉也。

六四

六居第四畫為賁之離。

賁如皤如。

象也。九三居文明之極。六四有輝光之懿。二爻當上。

下剛柔相雜之際。故皆曰賁如。賁之成卦以六二自外來而文二剛上九自內往而文二柔也。九三與六二比近而得其賁。故濡如。六四與上九隔遠。白馬翰如。象也。而不得其賁。故皤如。言白而未受采也。白馬翰如。六四震馬之中。畫坎馬之上。畫變為剛。則成巽為白。翰如言其走之疾如羽翰也。六四弗得上九文柔之賁。故疾走以就正。應而求匪寇。婚媾。象也。四與初正應。然初九孤賁於初九之陽。匪寇。婚媾。潔自守。近不昵。二遠不交。四二比爻也。不就之者義也。四應爻也。就之者正也。初不昵。二而并疑。四因六四之下求初九之疑。始釋而知六四非寇也。乃己之婚媾也。象同屯六二。

六五

為六居第五畫為賁之家人

賁于丘園

象也六五柔中艮體有德之賢止而不仕者也艮之

中畫山之半也為丘園丘之有草木者互震草也體艮木也丘園賢者隱處之地上九一剛為二柔之君賁二

柔者也六四隔遠不受其賁所賁者六五而已以上九賁六五為上之人禮聘賢者恩光下逮賁于丘園之象

束帛戔戔

象也五兩為束坤為帛而坤之上畫連束之於外之象戔戔委積貌多也賢者隱處而受

聘幣之禮其光顯榮輝被于丘園如伊尹耕於有莘之野而湯以幣聘之也

吝

占也柔雖得中而不當位

故終吉

占也受君賜之榮故終吉

上九

為上之畫得九

白賁

象也賁自泰變者也泰之九二升在上而文二柔泰之上六降

在二而文二剛然初九不肯受二之賁受二之賁者惟九三一剛六四不能受上之賁上之賁者惟六五一

柔濡如之賁丘園之賁虛文之飾爾有之不為甚益无
之不為大損二爻成賁之功亦淺鮮矣賁極當變變而
復于泰則善不變而受之剥則壞矣文窮反質賁復為
泰以還其初上九復于二六二復于上則三剛三柔皆
守其質而不相文所謂白也泰二三四互兌為白故曰
白賁於卦終總言賁極而反質白者通全卦而言非專
指上九一 **无咎** 占也文極必弊復反于質
爻言也 則不至於弊矣故无咎

六畫俱九六
為賁之困

經彖辭凡七字爻辭凡五十四字賁彼偽切舍
音捨瞞白波切又音槃翰雄干切莪在干切又
音賤註具必佩切扉扶味切鮮澤音
仙錯千各切昵女力切淺鮮雖典切



坤下
艮上

○ 八之七上之十二
緯五陰辟主六五

剝此義皇坤下艮上之卦而文王名之曰剝五陰長盛也五陰消去五陽也不利有攸往五占也以卦體而言則陰長已至之矣故不宜有往以占者而言則小人極盛之時當順時而止不可以有所往也

初六為剝之頤得六剝牀以足象也陰始消一陽而為姤六月一

二陰消二陽而為遯七月三陰消三陽而為否八月四陰消四陽而為觀九月五陰消五陽而為剝剝之初六

即姤之初六也故此以姤之初六言之姤之初六下耦承上奇牀之象初為牀之足陰消陽自下始五月姤之

一陰始消一陽於下猶剝牀而先及其足也茂貞凶占也陸氏曰茂猶削也

當小人削蔑君子之時正主事則凶也

楚俗有削蔑之言澄謂

六二為剝之蒙 剝牀以辨 象也剝之六二即遯之六二也此以遯之六二言之

辨牀之幹也中畫象之剝陽至下卦之中畫猶自牀足而上剝至于幹也 蔑貞凶 占也與初六同

六三為剝之艮 剝之 象也剝之猶比卦言比之損卦言損之益卦言益之小過卦言

過之也之指陽而言剝之六三即否之六三也此以否之六三言之謂剝陽已及三也三牀之上也不言剝牀

而汎言剝之其辭比初六六二六四差緩也剝陽及三者乘陰長之勢至此非專三之罪三雖居剝陽之位而

獨與上九一陽為應則无害陽之心故聖人 无咎 占也

繫爻特異其辭以別於初二四之三陰也 程子

曰衆陰剝陽之時三獨居剛應剛 志從於正在剝之時為无咎也 剝牀以膚 象也剝之六四即觀之六四也此以觀之六四言之

言剥陽已及于四也。四在人為身之位，膚者身之皮膚也。初為牀足，二為牀辨，三為牀上，人所臥處。四人之身也。非牀也，非牀而曰剥牀，以膚也。凶，占也，災已言剥牀而上及於人之肌膚也。及身矣。

六五

為剥之觀

貫魚

象也。六五變為剛，則成巽。巽下之柔為魚，一柔之下又有三柔。

羣魚之象也。五變為剛，畫連亘其上，貫穿之象也。魚陰物，五羣陰之主，在上統率羣陰，如貫穿羣魚而為一也。以宮人寵也。象也。以者將之也。宮人衆妾也。以之者誰后陰戴陽如后，以衆妾進御於王而獲寵愛之象。陰長消陽至於五極矣，不可以再長也。一陽在上，非可剥者，故取羣陰順承一陽為義。六三應上九而寧失羣陰之心。六五比上九而率羣陰以求一陽之寵，一陽之功大矣。天道之不可一日无陽，世道之不可一日无君子者，此也。項氏曰：六五君位，五為王后，與君同處，四為夫人佐。

后者也三為九嬪以主九御下无不利占也程子曰五卦之長也二為世婦初為御妻无不利能使羣陰順序如貫魚然獲寵愛於上之陽如宮人則无所不利也

上九

為上之畫得九

碩果

象也艮為果蓏謂上畫一剛蓏謂中下二柔上九艮之上畫

故為果碩謂

不食

象也卦无兌口故不食下五陽皆已陽之大也剥獨存一陽在上如木之果實皆已

落獨一碩大之果不為人所食而猶在木末論語云吾豈匏瓜也哉焉能繫而不食亦匏瓜不為人所取食而常繫於君子得輿占之象也君子謂一陽坤為輿五陰蔓也承戴上九之一陽如人之在車上君

子筮得此爻則其象

小人剥廬

變為柔也小人謂上九為得輿而占亦如之

陰有廬之象奇變為耦則如廬之破壞穿漏其上而无以蓋覆其下故小人筮得此爻則其象為剥廬而占亦

如之也

六畫俱六九
為剝之夬

經彖辭凡六字爻辭凡五十六字蔑莫結切辨
平免切註去之起呂切下同長之兩切別彼列
切菰李果切
覆字豆切



震下坤上

○ 四之八上之十三
緯一陽辟主初九

復此義皇震下坤上之卦而文王名之曰復一陽初生
於地下而消一陰夏正十一月之卦也復還反也冬

至之前六陽消盡而為純坤冬亨占也陽出入无疾也
至之後一陽還反而生于下也復則亨

凡一陽之卦皆自復而變无有自他卦變為復者此取
復所變之卦再還復未變之時為義師自復而變者也

師之初還復于二為出師之二還復于初朋來无咎占
為入筮者占之或出外或入內皆可无疾
一陽既生日進日盛又取臨泰大壯夬所變之卦還復
未變之時為義明夷自臨而變者也明夷之三還復來
二則為二陽之臨歸妹自泰而變者也歸妹之四還復
來三則為三陽之泰需自大壯而變者也需之五還復
來四則為四陽之大壯大有自夬而變者也大有之上
還復來五則為五陽之夬此陽之朋類次第而來也筮
者占之已之或出或入既无疾反復其道七日來復占
而朋類自然來至者亦无咎也
自五月一陰生至十一月一陽生凡歷七月筮者占之
出外而反者還復其初所行之道路則七日可以來至
於家而復也道者震利有攸往占也陽之長貴乎日進
為大塗七震之數也利有攸往故占者宜有所往也
初九為復之畫得九不遠復象也師卦自復而變初九自

遠而遯也。无祗悔，占也。祗，適也。祗，抵也。猶云至也。字從衣從復者也。无祗悔，氏與祗敬之祗不同。祗敬之祗從氏從示。程子曰：无祗悔，不至於悔也。復者，陽反來復也。陽君子之道，故復為反善之義。失而後有復，不失則何復之有？唯失之不遠而復，則不至於悔。元吉，占也。常人筮得之固无至於悔也。復則不至於悔，元吉矣。有大善之德者，筮得之則吉也。

六二

六居第二畫為復之臨

休復

象也。人於勞暵之時，得依木之

否之九五，中正大人也。在下者依其芑蔭，以休息於否將變之時，故曰休否。初九一陽之復，勢孤援寡。六二中正與初九比近為朋，初九在下依其芑蔭，相與休息。六二變而為剛，同初之復，故曰休復。否五復二，皆卦之中也。否有巽木復有震之竹。吉，占也。陽剛浸長，相與休息與萑葦為芑蔭，可休之處。同其吉也。或曰：凡占辭特

為占者設爾然聖人繫辭之意則有定指此吉字指六二乎指初九乎曰六二能比初九依之以息六二之吉也而初九與有焉

六三

六居第三畫頻復象也頻水厓也六三變為剛二

盡處瀕乎水也行至水厓不可厲占也阻水不無咎占以進而後復復之不早者也厲能進故厲

能復故亦無咎也

六四

六居第四畫中行獨復象也行者路也震為大塗

遠陽四居遠近之中猶路之半也故曰中行五陰唯四與初陽為應四變為陽則與初九同是震體下畫之一陽獨能與初九一陽之復同者也故曰獨復

六五

六居第五畫為復之屯

敦復

象也三四五互坤五為坤上畫坤土最厚之處敦之象敦者篤

厚靜重而若遲鈍亦復而不速之意

无悔

占也由初至五五畫之復六五最後復雖不速然柔順得中故

悔无

上六

上之畫得六為復之頤

迷復

象也迷者冥行失其正道也上六一卦之終猶迷塗至極盡之

處也迷行至終乃求還反晚矣梁武帝之迷至侯景兵入臺城而圖復唐明皇之迷至安祿山陷洛陽而圖復當是時也雖復竟何如哉舊註皆謂上六終迷不復案爻辭言迷復註謂迷而不復似與經竟相戾始也南行今回轅向北始也北行今旋面向南是之謂復楚辭云迴朕車以復路兮及行迷之未遠復字從彳卦爻之義皆以行取喻初曰不遠者行至水涯而復四曰中行者行息於塗而復三曰頻者行至水涯而復四曰中行者行

至中道而復五曰敦者敦篤緩行而復上曰迷者迷行至終而復行而迷失正道者其終之復亦是循其故道而復然其故道非正道也往復皆迷展轉錯誤不可專以能復為善不由其道而復者雖復亦不善也上為冥昧之位六為柔凶占也如梁武帝有災眚占也占既曰暗之質故迷凶唐明皇是也

有災眚

占也占既曰凶矣而又曰

有災眚何也迷復有輕重大小也其重者大者則凶輕者小者亦有災眚災謂禍災眚謂過眚災自外至而由己所致眚自內有而非己所致也眚災者非己所致而為災書帝典王誥言眚災是也災眚者由己所致而為眚此復之上六及小過用行師終有大敗占也上二占之上六言災眚是也

用行師終有大敗

占也上二占泛言之此一

占專以行師一事言師卦由復而變一陽統坤衆也行亦取震塗之象大謂上六變為陽也復之六五不取君義上六位最高變為陽而下臨坤衆有君象焉但常時所行既失君道民心之去久矣一旦用其民民豈為之

用哉故其君必至於敗是之謂大敗如商以師敵周而
前徒倒戈衛以師禦狄而受甲兵者曰余焉能戰商紂
衛懿卒以其國君凶占也以如春秋蔡侯以吳子及楚
以敗亡以其國君凶人戰于栢舉之以上行師者自
主兵也此言以其國君者不自主兵出兵助人如為人
所以也國君亦指上六下有坤土為國變為剛而居上
曰君以者他人以之初九一陽為主于內者君也上六
變為陽而統衆于外又一君也故有內國君以其外國
君之象凶如鄭國君王世克以夏國君實
建德拒唐師而建德并為太宗所禽也至于十年不
克征占也行師一事分為三占既言為己為人兩皆凶
敗矣又言自己不興師亦不為人興師幸可免目
前之凶敗然民心離貳國勢削弱久而至于十年之後
亦不能出征也十坤數案周易雖用爻之變為占而爻
辭多只就不變起義其取變者間見耳復之六爻惟初
九一陽為已復者故爻義以不變者言其餘五陰乃未

復者而爻辭各有復字皆取爻之變者言也蓋不變為陽則不可謂之復矣

六畫俱九六為復之始

經彖辭凡二十二字爻辭凡五十九字祇音支註長盛知兩切下同喝音謁間見居限切

三三

震下乾上 ○ 四之一上之十四緯二陰遯變主初九

无妄

此義皇震下乾上之卦而文王名之曰无妄无妄者誠也有天理之真實无人欲之虛偽凡陽剛象

天理之誠陰柔象人欲之妄卦自遯變遯三來初以陽剛之正易去陰柔之不正為去妄存誠之義故曰无妄

元亨

占利貞占也无妄之動以天故其占與乾卦同

其匪正

目下二占无妄者无私心

而又合正理也雖无私心苟不合正理亦是妄也其所為非正理則其占如下之所云

有眚

占也匪正

則有不利有攸往占也匪正而不往且過尤不利有攸往有昔往則是妄動也

初九初之畫得九為无妄之否无妄往吉占也陽剛當位而无應得正理而无私心也為无妄

之主當震動之初无妄而往者也故吉

六二六居第二畫為无妄之履不耕穫不菑畬則利有攸往占也耕

占之象也春而治田曰耕秋而收禾曰穫初墾荒田曰菑三歲熟田曰畬不耕穫謂不耕而穫不菑畬謂不菑而畬夫有耕然後有穫有菑然後有畬不耕而穫不菑而畬者何也在先无求之之心而在後有得之之實也此所謂无妄也无妄史記作无望謂无所期望而有得盖亦此意夫陽剛之實為无妄二雖中正然質柔非剛而又有應非剛則未能實也有應則未能无私也是未能純乎无妄之道也有攸往者往應五也往應五者求

陽剛之實以益已也得剛實以益已雖為正事而求之之心猶為私心也必也先絕其有求之心所謂不耕不菑也後自獲其有實之益所謂獲畬也言能如此則所往乃為无妄也有應之私易至害於无妄之道故爻辭為之戒孟氏集義養氣之學不掘苗以助長而氣自无餒盖如此也震起耕象乾金獲象二地上為田菑畬之象

六三

六居第三畫為无妄之同人

无妄之災

占也筮得此爻者其占為有災而其災非由已

致朱子曰卦之六爻皆无妄者也澄案无妄之善有三剛也當位也无應也剛者實也當位者正也无應者无私累也諸爻或有其三或有其二或有其一初九三者全其最善也九五九四有其二九五剛而中正九四剛而无應是其次也六二上九有其一六二中正上九剛實是又其次也唯六三於三者咸无焉而亦得為无妄

何也下比中正之六二上比剛實无私之九四譬如有
人在己雖無一善而上有嚴師下有良友親近切磨夾
持熏染亦不至於為惡此六三之所以亦得為无妄也
項氏曰六三所遇之災非人為也故為无妄之災廬陵
楊氏曰我求而我得者有妄之災或繫之牛行人之得邑
災非我求而我得者无妄之災

人之災

象也設此象以明上占辭如或繫一牛於此乃
邑人之牛也偶脫所繫而為行人所得邑人有

失牛之災亦適然不幸爾非已有以致之是謂无妄之
災因卦變取象无妄自遯變遯下卦艮也坤為牛艮以
一陽交坤上畫為坤之君坤牛艮之所有也一奇實坤
上畫之畫如有物以繫牛之前也此以遯之九三未變
為无妄之六三而言也及遯之既變為无妄也三下易
初成震則震之一陽為坤之君而坤牛為震之所有矣
震動于大塗行人也初非人位而曰行人者初自三之
人位來也震遂有坤行人得牛也无妄六三坤上畫也

坤為邑三人位邑人也己所有之牛為他人所得失牛者災也六三之遇此災莫之致而至也廬陵楊氏謂牛繫於斯塗之人取去牛主訟邑居者而已朱子亦謂行人牽牛以去而居者遭詰捕之擾考之爻象无此義

九四

九居第四畫

可貞

占也九四乾體剛實无應故可

者宜也可

无咎

占也居不當位當有咎也

者僅可

以有實无私故得无咎

九五

九居第五畫為

无妄之疾

占也筮得此爻者其占

致九五剛健中正可謂无妄矣而下有應故曰疾疾者以外物之應能為内心之病也然有有妄之疾有有妄之疾常人之於應物外物一接而已心從之此有妄之疾也聖人之於應物其心湛然如明鏡止水物來則照物去不留動而无動雖應未嘗應也是之謂无妄之疾

勿藥

占之戒辭也有妄之疾必須用藥治療无

妄之疾慎勿用藥治療也外物之紛至任其自來自去勿藥者也若或厭惡而以術屏絕之是用藥以治療也非徒无益而又有害告子之冥然罔思悍然力制以為不動心釋氏之息滅人倫違棄世故以為不住相犯勿藥之戒

有喜

占也疾去曰有喜不治療而其疾自去不屏外物而外物自不能為累也

上九

為无妄之畫得九

无妄行有眚

占也上九之善雖不及初九然亦无妄者也初

九以无妄而往則吉上九以无妄而行則有眚何也時位不同也无妄之有往也何所為而往乎豈為濟其欲哉蓋為進其善也進善者如登可上不可下也初九之位猶下時之初也其往也進而升於上也上九之位已極時之終也前无可往之地矣唯有退而降於下爾初九言往者謂其進前也上九言行者謂其在塗也既不進而上則必退而下以就所應之六三六三震體故曰行夫无妄之德動而健未嘗禁其行也但上九時位已

至窮極故不可以有行靜守而終焉可也大抵无妄六
爻下三爻以動為善初九往則吉六二如是而往則利
六三居而有災上三爻以靜為善九四可貞无攸利占
而无咎九五勿藥而有喜上九行而有眚也

於己既有眚於
事亦无所宜也
六畫俱九六
為无妄之升

經彖辭凡十六字爻辭凡六十二字蓄則斯切
註去妄起吕切夫有音扶後夫陽夫无同易至
以鼓切握一戛切助長知兩切餒年猥切厭伊
欠切惡烏路切住相息亮切屏必令切累郎遂
切所為為濟為
進竝云偽切



乾下
艮上
○一之七上之十四緯
四陽大壯變主上九

大畜

此義皇乾下艮上之卦而文王名之曰大畜大謂陽也畜者藏也亦有止義一陰畜藏於五陽之中

為小畜一陽畜止於二陰之上而三陽畜藏於二陰之內故為大畜陽固為大聖人名卦於陽之多者特以大

名五陽為大有四陽為利貞占也一陽在上為畜止

大畜大壯大過是也利貞之主宜於正主事也

不

家食吉

占也陽剛之畜象賢人之聚賢人衆多則當食君之祿而不食於家也家人二五易位成大畜

大畜與家人易位不在家

利涉大川

占也三四五上有舟象乾健應五上

也兌口在四食於外也

進有舟行

而前之象

初九

初之畫得九有厲占也程子曰大畜艮止乾也故為大畜之蠱乾三爻皆被止在他卦則正應

相援者也在大畜則相應乃為相止陽上進之物上與

三皆陽故同志而无相止之義初陽剛健體居下必上

進六四在上止已安能敵在上得
位之勢若犯之而進則有危厲
利已占也已止也程子曰利在已而

不進也

九二為九居第二畫與說輶象也與下伏兔為輶二三四

去輿下之輶也九二當輿輶之處而其輶脫去故其輿
不行也程子曰二為六五所止勢不可進五據在上之

勢豈可犯也二雖剛健之體然其處得中道故進止无
失雖志於進度其勢之不可則止而不行如輿說去其

輶也

九三為九居第三畫良馬逐象也乾為良馬乾之三陽在

以進九三處下體之上漸可進矣健體之極
如良馬之馳逐然逐謂追躡於艮之後也利艱貞占也

良馬雖可以進然二柔止之於前其進甚難之時也故宜艱難以主事不可以易心處之也 日閑輿

衛

象也三四五上肖離為日閑習也古者乘車三人在車上步卒七十二人在車下輿之衛也當艱難之時

未可輕易而進且當每日閑習其輿之衛以為行之備九三變為柔三四五成坤為輿初二其衛也言九三當與二陽同心協力无日不訓利有攸往占也四止初五國人討軍實而為行計也 利有攸往止二故二陽皆不可往獨上九與九三同德同位既不止之而又援之以進况九三微備周完則宜有所往矣

六四

大畜之大有

童牛之牯

象也內乾之健為外艮所止止乾陽者艮二陰

也然二陰歸功於上九之一陽蓋艮由上一陽而成卦所以止也彖傳所謂剛上而上賢能止健是取此義夫牛之角豕之牙皆剛物之在前者艮上畫一剛象之上九一剛畫在四五之前四之視上猶牛首之有牯五之

視上猶豕首之有牙四為童牛上為牯五為豮豕上為牙也牯者設橫木於牛角以止觸所謂福衡也六四艮之下畫即坤之下畫也坤為牛艮為男之少牛之童豮者童牛未有角之牛也坤牛而連其上畫設橫木於牛首之象童牛无角故上元吉占也六四尊成卦之主而畫之剛不象角而象牯元吉以止健之功歸上九占之

所以為元吉

六五

六居第五畫為大畜之小畜

豮豕之牙

象也豕去勢曰豮坎為豕坎五上相易成艮坎

中畫之剛易為柔是剝去其中之實豕之豮者也坎上畫之柔易為剛是已豮之豕而有牡牙之剛在外也六五之中虛象豮豕上九之外剛象牙六吉占也柔以剛五之柔能以外剛為主故曰豮豕之牙為主故吉也

上九

上之畫得九為大畜之泰

何天之衢

象也何與噬嗑上九何校之何同後漢王延壽魯靈

光殿賦云荷天衢以元亨何作荷以人一身而言上為首何謂以首戴之也天之衢雲霄之上四通八達之路无所障礙之處也何天之衢其辭猶詩言何天之休何天之龍其意猶莊子言鵬之背負青天而飛於九萬里之上也大畜者一陽止於外而三陽畜藏於內畜極則散止極則行故上九雖艮體至畜之終則不止而行也蓋初九九二之進為四五二柔所阻上九與九三同德其位相應不阻其進而引之使前九三得超二陰以達於上九上九天之上之衢九三進造其下如何之以首通行乎雲霄之路而莫之障礙矣項氏曰初九為六四所止九二為六五所止九三與上九相合健極而進前有二陰尚當艱貞而防衛既越二陰而至於上九則乾道通行无復疑阻矣上九在上亨占也陽剛之道得行而導乾以行故為天之衢

亨

无阻遏衆美之會也

六畫俱九六
為大畜之萃

經彖辭凡十二字爻辭凡四十八字利已夷止
切說吐活切輓音服日舊本作曰鄭虞皆作日
晁氏曰陸希聲謂當作日程朱並從之牯古毒
切殯符云切何河可切衢其俱切註度待洛切
易心以政切輕易同卒尊率切彖傳馳戀切夫
牛音扶福音福少詩照切犢亭篤切去勢起呂
切下同列音枯荷河可切之處充註
切龍陳隴切造七到切无復符后切



震下

艮上

○

四之七上之十五

純坎變主上九

緯

上九

上九

上九

上九

上九

上九

上九

上九

上九

上九

上九

上九

上九

頤此義皇震下艮上之卦而文王名之曰頤頤者人之
頤頤凡飲食皆自頤而入所以養人之身故頤有養

義程子曰上艮下震上下二陽中含四貞吉也觀頤象
陰上止下動外實中虛頤頤之象也

卦自坎而變先以二易上成觀再以五易初成頤故取
觀為象觀者下觀上也初九下頤也上九上頤也初九

觀上九之頤謂觀其養人之道也 自求口實 象也 自自

上九頤之主爻故得專頤之名 已謂初九

口實食物之實於口中者坎之初六其畫耦如口之虛

剛畫自五來實之口實之象初九先觀上九之頤又自

求所以實口之物謂求其自養之道也觀頤以坎之

二上相易取象自求口實以坎之五初相易取象

初九為頤之剝 舍爾靈龜觀我朵頤 象也 爾謂初我

九陽體靈龜喻其明智龜能咽息不食可以不求養於

外項氏曰頤卦肖離為龜靈龜伏息而在下初九象之

朵頤在上而下垂上九象之卦唯有二陽上九在上為

所養之主初九在下為自養之賢上九卦主故稱我羣

陰從我而求養固其所也初九本无所求乃亦仰而觀

我聖人以其居養之初故深戒之以明自養之道澄案

此爻辭與彖辭觀頤自求口實相表裏皆初九觀上九

也彖為初九言之則言初九既觀上九之養人者而又

自求其養己者爻為上九言之則言上九謂初九舍爾之養己者而觀我之養人者蓋陽實能自養而養人陰虛不能自養而資養於人頤之二陽能養者也四陰受養者也上九居上當養人之任故為朶垂向下之頤以養在下之羣陰初九處下不當養人之任故為靈智自養之龜而无求於外然卦有觀之象初雖下伏而猶上觀是羨上九之能養其下而无舍己為人凶占也項之意也與素其位而行不願乎其外者異矣凶氏曰有靈而不自貴

宜其凶也

六二

為頤之損

畫

顛頤

象也卦中四陰皆資初上二陽之養顛者頭頂倒而在下謂求

養於初也程子曰以上養下理之正也二不能自養反下求於初則為顛倒故曰顛頤

拂經于丘

頤象也拂謂舉手摩拭其上如引袖拂天星階前樹拂雲之拂經過也歷也丘謂六五五艮山之中畫為丘

經于丘如陶淵明言崎嶇而經丘也六二比初而求下
之養固為顛倒若欲拂上而求上之養則上非其應必
須經從六五之丘而後可至上九之頤六五雖為六二
所應之位然亦資養於上九何能為人求養也哉六二
拂上則必經于丘以求
頤故曰拂經于丘頤

征凶

占也下比於初可資其
養行而求上則凶也

六三

為頤之賁

拂頤

象也六三與上九應拂
摩以求養於上者也

貞凶

占也

上九之所養者養賢也六三亦受上九之養然陰柔不
中正不賢而竊祿者也所養之人如此何所用哉以之
正主事則凶矣如使鯨治水而績
弗成使管叔監殷而以殷畔是也
有為也十年數之極戒以十年勿用
則終不可用矣三四五互坤十坤數
凶再曰十年勿用者言非但今時之凶雖後時亦不可
用也又曰无攸利者言非但此事之凶雖他事亦无所

无攸利

占也六三
之占曰貞

十年勿用

占也用謂
用此占而

也利

六四

六居第四畫顛頤象也六四與初九應顛吉

占也

陰柔

不能自養而求養於在下之正應如在上之人才有不
足而求益於在下大賢以養其德者程子曰四賴初之
養使在下之賢由己以行其虎視眈眈其欲逐逐象也
道而澤施於民何吉如之

龜又象虎龜者以其介甲之外堅虎者以其文明之外
著夫自養於內者莫如龜求養於外者莫如虎故頤之
初九六四取二物為象視亦離目之象也虎視常下眈
眈專一貌逐逐相繼也四之於初其下賢求益之心必
如虎之視下求食而後可其視下也專一而不他其欲
食也繼續而不歇如是則於人不貳於己不自足乃得
居上求无咎占也其占雖吉然苟下賢之心不專則賢
下之道无咎者不樂告以善矣求益之心不繼則未少

有得而止矣朱子曰視眊眊下而專也欲逐逐求而繼也能如是則无咎

六五

六居第五畫為頤之益

拂經

象也拂經謂拂上求養者之所經從也六五比近上九凡在下

求養於上九者皆必經從乎五而後至於上也案頤與噬嗑卦體相似噬嗑以上下二爻嗑中四爻頤以上下二爻養中四爻各以所比所應之爻而為受噬受養者噬嗑則初九噬二噬四上九噬五噬三頤則初九養二養四上九養五養三倒首在下曰顛引手摩上曰拂六二六四皆資養於下故以顛為象六五六三皆資養於上故以居貞吉占也六五陰柔才弱資養於上靜處而拂為象居貞吉正主事則吉朱子曰居貞吉如洪範用靜吉用作凶六五賴上不可涉大川占也卦之六畫有九之養故守常則吉舟象然卦變坎之九五降為頤之初九坎之初六升為頤之六五強者退後弱者進前故不可涉大川

上九

為頤之畫得九

由頤

象也一陽在上諸陰皆由之以

路人所由以求養厲占也居至高而求

吉

占也上能兼

於上者故曰由頤厲之者至衆故危

利涉大川

占也坎之

鄭氏剛中曰頤卦上三爻皆吉喜

其止也下三爻皆凶惡其動也

利涉大川

頤之上九坎之上六降為頤之六二

強者進前弱者退後故利涉大川

六畫俱九六

為頤之大過

經彖辭凡九字爻辭凡七十二字舍音捨拂數

勿切舊音符勿切者非耽東南切註頤戶感切

為初為上云偽切夫自音

扶樂告音洛惡其烏路切

䷚

巽下

兌上

○

五之

二上

之十

六六

緯

八純離變主上六

大過

此義皇巽下兌上之卦而文王名之曰大過大謂陽也過者不及之對行而踰越其處謂之過未至

其處謂之不及卦有六畫陰陽各三則為均平此卦陽畫四陰畫二陰半於陽小者不及也陽倍於陰大者過也故為棟橈象也棟屋之脊橈橈弱而曲也卦自離而大過變先以二易上而成大壯再以五易初而成大過大壯下四陽有棟象而大過所取棟橈之象又不與大壯同大過下卦巽木也上卦二陽皆巽木之身上一陰則巽木之末也通六畫象一木以此木為屋之棟中四陽象木身之強初上二陰象木本末之弱屋棟居中衆材輻湊木身雖強然棟之所任者重苟本末皆弱則亦不免於曲橈也大過陽之過盛也有棟橈之象何也中有四陽之強而上下猶有二陰之弱也聖人崇陽之意多以其未能如純乾之六陽故大者雖過而棟猶橈蓋猶有所利有攸往占也陽雖盛而不自亨占也

不足於此也

利有攸往

占也陽雖盛而不自亨

亨

占也

於往故
可以亨

初六

初之畫得六為大過之夬

藉用白茅

象也藉祭藉也古者祭祀縮酌沃灌薦牲薦黍稷皆

藉以茅巽為白又為茅初柔在下而承剛如白茅藉物之象陽之勢過盛故陰之承陽其謹敬亦過於常時譬之祭物措之於地亦可矣而必藉之以茅謹敬之至也
无咎
占也以卑弱之陰畏强盛之陽能過於慎

九二

九居第二畫為大過之咸枯楊生稊

象也楊易生而先榮感陽氣之盛者巽木之中上二

畫皆重陽楊之象也稊根上再生稊芽也二剛居中而變為柔楊枯而空其中之象中雖枯而下有初柔如根之生
老夫得其女妻
象也三四五互乾五乾夫之終為稊也老夫九二變為柔與九五應二三

四成巽二巽女之初為女妻楊根生稊長而為稊楊如老夫娶女妻猶能生育也 无不利也占

九三

為九居第三畫棟橈象也通六畫象一木為一棟以

南北初六木之本也指北而在後上六木之末也指南而在前三四木之中身也以本末之弱故當中身之處任重而曲橈此一卦之象也故彖辭云棟橈爻之三四皆當橈處故九三爻辭取象與彖辭同九四亦當橈處乃不曰橈而曰隆何也此又因兩爻之義有不同而異其象以寓教戒也夫棟之橈者別用短木培補其橈處則可以取平而不橈矣九二九五不當屋中故不橈以剛之過而裁減就中二五所裁減之餘可以資三四培補之用亦木工用材之法也九三以剛居剛强悍不受人益故九三之培補无所施而橈者自若九四以剛居柔謙抑能受人益故九五之培補自外來而棟之橈者隆然以起大槩陽過之時惡剛之居剛者惡其自恃也

喜剛之居柔者喜
其有以相濟也
凶占也棟而撓焉則屋之他材輻湊於棟者不得其宜矣所以凶也

九四為大過之井棟隆象也以剛居柔不自滿假能受益者也資九五之所餘以培補

其撓處故棟之撓者隆起而不撓也吉占也當撓之處能受人有他吝也占

有他謂應初四之撓正以本之弱幸賴五之培補而隆矣若又係初之應則吝也蓋四宜上資五之剛不宜下

應初之柔也

九五為大過之恒枯楊生華象也五剛居中而變為柔楊枯而空其中之象中已

枯而上有一柔如枝上生華也九二之陽臨之二也臨二陽建丑之月為楊根生稊之時九五之陽夬之五也

夬五陽建辰之月為楊枝生華之時老婦得其士夫象也二三四互乾二為楊枝生華之時乾夫之初士夫也九

五變為柔與九二應三四五成兌五兌女之終老婦也
老婦雖嫁士夫亦不能生育如楊枝之上生華非久即
飄零矣大過二五皆象夫婦者以其變為咸恒也二之
變為咸交感生育者也故取老夫女妻象五之變為恒
內外常居者也故取老婦士夫象或曰巽長女何以象
女妻兌少女何以象老婦曰長女者謂姊妹之次居第
一非謂年之已長也少女者謂姊妹之次居第三非謂
年之猶少也伯姬伯姜之十五十六也謂非女妻可乎
叔姬叔姜之五十六也謂非老婦可乎三畫之初為
女謂未嫁之時也三畫之終為老謂近死之年也稱女
稱老以卦畫之初終起義不以倫次之長少起義
也虞翻不達而以上為女妻初為老婦失之矣
无咎
占也變為柔而與二正應昏姻嫁娶
无譽
占也夫婦不
之正禮非比近不正之合也故无咎
无譽
當其年故无

稱可

上六

為上之畫得六

過沙滅頂

占也大過肖坎坎之中畫水也積四陽為一中畫水

之深過於常時也上為首之頂下應於三如下行至水深之處首頂被水浸過也四陽過盛二陰卑身以尊事乎陽者過其常度初柔居下而得其所故其仰承也謹而又謹上柔居高而不自安故其下行也卑而又卑如行過沙水愈趨愈下以至地

凶也无咎

占也過沙而滅卑水深之處滅沒其頂也

過卑以下於陽於義則无咎也

六畫俱九六為大過之頤

經彖辭凡九字爻辭凡六十一字撓乃教切藉在夜切梯徒稽切華古花字呼瓜切註處昌據切標力錦切易生以豉切長而知兩切後同夫棟音扶惡烏路切少詩詔切下同



坎下

○

六之六上之十七經

八純中男主九五

卷一

經

習坎

此義皇坎下坎上之卦而文王名之曰習坎朱子曰

習重習也坎險陷也陽陷陰中象水澄案坎之卦體乾中畫交坤上下二畫乾畫天一之水也坤畫兩岸之土也坤地陷下而水流其中岸高水深故為陷為險水由地中行者為坎非泉穴初出之水非平地散漫之水非沮澤鍾聚之水也習坎者二坎相重陷而又陷險而又險者也項氏曰重卦之序坎在六子之先故加習字以起後例示離震艮巽兌皆當以重習起義不與初經三畫之卦同也乾最為首不於乾加習字乾坤六畫只是一爻自二以上皆為習習義在爻不在重卦至六子而後有孚占也二五中實感入而人應之象重與單異有孚蓋四柔孚于二剛也故曰有孚維心象中剛象心二柔象纏絡於外中心亨占也彼之孚者行之實人係戀之而不解故曰維心

有尚

占也謂六四互震之上畫由大塗而行也四无應於下行則成九五中正之剛而得其配合於上也

初六

初之畫得六為坎之節

習坎

象也初六在重坎之下故曰習坎

入于坎窞

象也

坑坎中小穴旁入者曰窞坎之柔畫象水山占旁兩岸其耦象岸側小穴故曰入于坎窞

九二

九居第二畫為坎之比

坎有險

象也凡言坎字及險字皆指坎之中畫言也

求小

得

占也此以九二變為柔而言小謂陰也一陽陷於二陰之中未能出險苟有所求惟變為陰小則可有得也

六三

六居第三畫為坎之井

來之坎坎

象也來之如詩國風知子之來謂招之處內之指六三也九二為下卦之主主二而言曰來之謂九二欲招六三來處于二也來之則陷

于坎坎之中九五一坎險且枕象也居三則下有九二
九二又一坎故曰坎坎險且枕之險且已又枕于其上
處不入于坎窞象也初與三皆坎之耦畫故其象同謂
安也之坎窞初在下坎之內三在上坎之內
故皆勿用占也筮得此爻者戒之使
曰入勿用勿用則必有凶悔吝也

六四六居第四畫樽酒簋貳用缶象也坎為酒二三四

尊盛酒以簋盛食又以缶盛酒貳其尊虞氏曰貳副也
禮有副尊故貳用缶朱子曰貳益之也周禮大祭三貳
弟子職左執虛豆右執挾匕周旋而貳是也澄案周官
大祭三貳其下云皆有酌數皆有器量鄭氏註謂酌器
所用注尊中者貳用缶缶即酌器也為尊之
副尊中之酒不滿則酌此器之酒以益之也納約自牖
象也納如納言之納約謂歡好相結之言坎之柔維繫
於中剛有繩約之象四耦畫虛而通明又當西之位故

象牖上卦三爻上六居險極而陷于罪惟四五二爻剛柔各當其位四以柔正順承五之剛中正設饗禮以尊事之自牖而出往通於五以納其結歡之約誰能出不由戶不由戶而自牖蓋非常時所由出之處四五非正應而以比近終无咎占也比近相得雖不如正應然既相得故也終无咎是敵應无相與者於險陷之時親仁善鄰講信修睦可謂合時之宜矣朱子曰始雖不甚好然於義理无害故終无咎

九五

九居第五畫為坎之師

坎不盈

象也九二九五為險陷之主九二之坎有險謂坎之中有

流水而深也九五之坎不盈謂坎之中有流水而不滿也蓋流水陷在深地而不上及兩岸者也

祇既

平无咎

占也盈科而進水之道也盈則與岸平矣九五變為柔則不盈者未有盈之時也程子曰抵於

既平則无咎未平而尚在險中未得无咎也九五剛中之才居尊位宜可濟險然下无助也二陷於險中未能

出餘皆陰柔非濟險之才人
君雖才安能獨濟天下之險

上六上之畫得六

係用徽纆寘于叢棘三歲不得

象也

黑索也所謂纆綆也坎有繩係之象坎中實象棘之身
外耦象棘之刺二坎象棘之叢蓋拘係罪人之處梅之
以棘也三者坎之數上六陰柔居險極乘剛中正之君
失為民之道者也故陷於罪戾既係縛之以徽纆又囚
寘之于叢棘三歲而不得免也周官司圜收教罷民能
改者上罪三年而舍其不能改而出圜土者殺三歲不
得罪大而不凶占也犯上
能改者與凶而致凶也

六畫俱六九
為坎之離

經彖辭凡十字爻辭凡七十二字審徒坎切枕
針甚切祇音支徽許韋切纆音墨寘之豉切註

沮子須切盛時貞切量音亮好吁告切縲力追
切綫辛列切刺千恣切罷音皮舍音捨者與音
余

三三

離下

○

三之三

上之十八

經

八純中女主六五

離

此義皇離下離上之卦而文王亦名之曰離離麗也

明也一陰附麗上下二陽而明象火象日二離相重

麗而復麗明利貞

占也下卦三畫皆得正二

亨

占也由

而復明者也利貞

五皆得中故宜於正主事

利貞而

亨

亨

畜北牛吉

占也畜養之也牛北皆坤象離中畫一陰

也

四畫之中如牛之繫養于牢也項氏曰坤以全體配乾

而行故為牝馬之行地離以二五附乾而居故為牝牛

之畜

養

之畜

之畜

之畜

養

之畜

之畜

之畜

之畜

之畜

之畜

之畜

之畜

之畜

之畜

初九

為初之畫得九

履錯然敬之

之象也初趾也剛畫如趾

履履地也附麗之初善惡未別明之初不可太察故履錯然而雜進者皆當敬之

无咎

占也初

六二能敬之故六二无咎非初之无咎也

六二

為居第二畫

黃離

象也黃中之色二

元吉

占也坤

象黃裳為文在中離六二之象黃離亦為文在中故其占同

九三

為居第三畫

日昃之離

象也五者上卦之中當天

三者下卦之終當人之位故日在三為昃之時日昃之離如人之老而光景垂盡也

不鼓缶而歌

則大耋之嗟

象也九三變為柔成震成艮震為鼓為聲而二三四有缶象艮為少男有反老還童

之象詩述陳國之風史稱秦人之俗皆鼓缶而歌蓋以樂生也人之老也不能以生為樂則必以死為憂矣年八十曰耄九三下卦之終陽氣將盡故曰大耋二三四互倒體之兌歌嗟於兌口取象此爻有將老而死之象其變又有復少而生之象人能自作凶占也以其近死元命或順受正命則皆樂而不憂也凶故凶惟超出乎生死之外者能不凶也

九四

九居第四畫為離之賁

突如

象也此言下體之象突竈突也說文引突字作方以為不順之

子義固可通然焚如取火象則突如亦當取火象其來三四當繼明之時而二剛相值傳繼之不善者也

如焚如死如棄如

象也此言上體之象舊火上升三以接乎四如火氣之出於突新火下來

四以逼乎三其猛烈如火之焚繼承之際不善如此必至身殞國亡九四變為柔成坎成艮火入坎水而滅死

也火滅成灰而歸于艮山之土
棄也其安慶緒朱友珪之事乎

六五為離之同人出涕沱若戚嗟若
象也涕目液也離為目有出涕象二

三四五肖坎為水為雨有沱若象五心位有戚象三四互兌為口有嗟若象六五為重離之主繼明而嗣位者也居倚廬而无命戒百官總己以聽於冢宰其哭泣而出涕也至於沱若其居喪而戚也至於嗟若以繼父為悲不以得位為樂也吉占也項氏曰九四逆子也來嗣天子之孝者蓋如是迫焚如六五順子也悲憂不樂四五之吉凶可知矣

上九為離之豐王用出征有嘉
占也離有甲冑戈兵之象王者筮得此爻

而用之以出征則有嘉美之功王謂六五出謂自五往上征謂興師正其罪六五之所征者上九也初上二爻竝

以時之初終起義方初之時而已附麗者則敬之以示
勸也至終之時而不附麗者則征之以示懲也上九居
重離之終乘君位之上怙終不臣者也與比謙之上六
同六五繼體重明之君如啓嗣禹成王嗣武王啓嗣位
而有扈不服成王嗣位而商奄不靖上九之征如啓之
征扈成王之征奄也離之上體二剛皆不正剛惡者也
故四則不子
折首獲匪其醜无咎
占之象也以人身言
上則不臣
首在上獲謂兵之所
俘獲醜衆也首指上九醜指衆爻至終而不附麗者上
九而已其他皆已附麗者也所征者獨上九而衆不與
焉故所折者首爾所獲者匪其醜也國不受
兵則无所俘獲矣刑不濫武不黷所以无咎

六畫俱九六
為離之坎


經彖辭凡八字爻辭凡六十九字畜許六切錯
七各切耆田節切折之舌切註復符后切別彼


列切少詩詔切下同樂音洛下同
怙徒忽切不與音預黷徒各切

易經纂言卷一

謹案卷一第十五頁後五行貞大人吉今本大作
丈此蓋從古本是書內經文多與今本互異繕
錄並仍其舊後不複簽

第三十六頁後一行自上達乎外而鳴者按外字
屬下字之訛





總校官庶吉士

臣

張能照

校對官檢討

臣

郭寅

寅

膳錄監生

臣

劉垠

垠

膳錄監生

臣

萬在衡